

I. Na Lii

KA BUKE MUA

- ¹ UA elemakule ae la o Davida ke alii, a ua nui kona mau makahiki, a uhi ae la lakou ia ia me na kapa, aole nae ia i mahana'e.
- ² Nolaila, i olelo aku la kana mau kauwa ia ia, E imiia'ku kekahi wahine hou puupaa no kuu haku ke alii; a e ku oia ma ke alo o ke'lii, a e lilo ia i kahu nona, a e moe ia i kou poli, i mahana'e kuu haku ke alii.
- ³ Alaila imi hele ae la lakou i wahine hou maikai ma na aina a pau o ka Israela, a loaa ia lakou o Abisaga no Sunama, a alakai ae la lakou ia ia i ke alii.
- ⁴ He maikai loa hoi ua wahine la, a lilo ae la ia i kahu malama no ke alii, a lawelawe ae la oia nana, aole nae i ike ke alii ia ia.
- ⁵ Alaila o Adoniiia ke keiki a Hagita i hookiekie ae ia ia iho, i iho la, E lilo au i alii: hoomakaukau ae la hoi ia i mau kaa me na kanaka hololio nona iho, a me na kanaka he kanalima e holo imua ona.
- ⁶ Aole hoi i hoonaukiuki ae kona makuakane ia ia i kekahi manawa, i ka ninau ana'e, No ke aha la oe i hana'i pela? a he maikai loa kona kino, a ua hanau ae la kona makuwahine ia ia mamuli iho o Abesaloma.
- ⁷ Kamailio ae la oia me Ioaba ke keiki a Zeruia, a me Abiatara ke kahuna, a kokua ae la laua mamuli o Adoniiia.

- ⁸ Aka, o Zadoka, a me Benaia ke keiki a Iehoiada, a me Natana ke kaula, a me Simei, a me Rei, a me ka poe kanaka koa o Davida, aole lakou me Adoniiia.
- ⁹ Pepehi iho la o Adoniiia i na hipa a me na bipi kauo, a me na bipi kupaluia, ma ka pohaku o Zoheleta, e pili ana i ka punawai Rogela, a kii aku la oia i kona mau hoahanau a pau, i na keiki a ke alii, a me na kanaka a pau o Iuda na kauwa a ke alii.
- ¹⁰ Aka, o Natana ke kaula, a me Benaia, a me na kanaka koa, a me Solomona kona kaikaina, kana i kii ole aku ai.
- ¹¹ Nolaila olelo ae la o Natana ia Bateseba i ka makuwahine o Solomona, i ae la, aole anei oe i lohe e alii ana o Adoniiia, ke keiki a Hagita, aole hoi i ike ke kakou haku o Davida.
- ¹² Ano hoi ea, e ao aku au ia oe, i hiki ia oe ke malama ikou ola nei, a me ke ola o kau keiki o Solomona.
- ¹³ E hele oe a e komo aku i ke alii Davida, a e olelo aku ia ia, Aole anei oe i hoohiki up kau kauwawahine, e kuu haku ke alii, i ka i ana mai, Oiaio e alii ana o Solomona o kau keiki mahope iho o'u, a e noho oia maluna o ko'u nohoalii? No ke aha la hoi e alii nei o Adoniiia?
- ¹⁴ Aia hoi, i kou kamailio ana malaila me ke alii, owau no kekahī e komo ae mamuli ou e hooiaio i kau mau olelo.
- ¹⁵ Alaila komo ae la o Bateseba i ke alii i kona keena, he elemakule loa ke alii; a malama ae la o Abisaga no Sunama i ke alii.

- ¹⁶ Kulou iho la o Bateseba, me ka hoomaikai aku i ke alii. I mai la hoi ke alii, He aha kau?
- ¹⁷ I aku la hoi oia ia ia, E kuu haku, ua hoohiki oe ma o Iehova la kou Akua no kau kauwawahine, Oiaio e alii no Solomona kau keiki mahope iho o'u, a e noho oia maluna o ko'u nohoalii.
- ¹⁸ Aia hoi, ano, e alii ana o Adoniia, eia hoi, e kuu Haku ke alii, aole oe i ike.
- ¹⁹ Ua pepehi ae la oia i na bipi kauo, a me na bipi kupaluia, a me na hipa he nui, a ua kii ae hoi oia i na keiki a pau a ke alii a me Abiatara ke kahuna, a me Ioaba ka luna o ka poe koa, aka, o Solomona kau kauwa, kana i kii ole aku ai.
- ²⁰ A o oe, e kuu haku ke alii, ke kau nei na maka o ka Israela a pau maluna ou, e hai aku oe ia lakou i ka mea e noho maluna o ka nohoalii o kuu haku ke alii, mahope iho ona.
- ²¹ A i ole ia, eia paha, aia hiamoe kuu haku ke alii me kona mau makua, alaila e kapaia auanei maua me ka'u keiki Solomona he mau mea hewa.
- ²² Aia hoi, i kona kamailio ana me ke alii, komo ae la o Natana ke kaula.
- ²³ Hai aku la lakou i ke alii, i aku la, Eia'e, o Natana ke kaula. A komo ia imua i ke alo o ke alii, kulou iho la ia imua o ke alii ilalo kona alo i ka honua.
- ²⁴ I aku la hoi o Natana, E kuu haku ke alii, ua olelo anei oe, E alii ana o Adoniia mahope iho o'u. a e noho oia maluna o ko'u nohoalii?
- ²⁵ No ka mea, ua iho aku oia i keia la a ua pepehi i na bipi kauo a me na bipi kupaluia, a me na

hipa, he nui loa, a ua hea aku oia i na keiki a pau a ke alii, a me na luna o ka poe koa, a me Abiatara, ke kahuna, aia hoi, ke ai nei lakou ke inu nei hoi imua ona, me ka olelo aku, E ola ke alii, o Adoniiia.

- 26 Aka, owau nei, owau o kau kauwa nei, a me Zadoka ke kahuna, a me Benaia ke keiki a Iehoiada, a me Solomona kau kauwa kana i kahea ole mai ai.
- 27 Ua hanaia anei keia mea e kuu haku ke alii, aole hoi oe i hoike mai i kau kauwa nei, i ka mea e noho maluna o ka nohoalii o kuu haku ke alii mahope iho ona?
- 28 Alaila olelo mai la ke alii Davida, i mai la, E kahea aku ia Bateseba io'u nei. A hele mai ia imua i ke alo o ke alii, a ku iho la ia imua o ke alii.
- 29 Hoohiki iho la ke alii, i mai la, Ma ke ola o Iehova, ka mea nana kuu uhane i hoopakele ae mailoko ae o ka popilikia a pau,
- 30 E like me ko'u hoohiki ana nou, ma o Iehova la ke Akua o Israela, peneia, Oiaio, e alii ana no o Solomona kau keiki, mahope iho o'u, a e noho oia maluna o ko'u nohoalii, ma ko'u hakahaka; pela io no wau e hana aku ai i keia la.
- 31 Alaila kulou iho la o Bateseba ilalo ke alo i ka honua, a hoomaikai aku la i ke alii, me ka olelo aku, E ola mau loa kuu haku ke alii Davida.
- 32 I mai la hoi ke alii Davida, E kahea aku ia Zadoka io'u nei ke kahuna, a me Natana ke kaula, a me Benaia ke keiki a Iehoiada. A hele mai la lakou imua i ke alo o ke alii.

- ³³ I mai la hoi ke alii ia lakou, E lawe pu me oukou i na kauwa a ko oukou haku, a e hooholo ia Solomona ka'u keiki maluna iho o kuu hoki, a e lawe ia ia i Gihona.
- ³⁴ A na Zadoka ke kahuna, a me Natana ke kaula ia e poni i alii maluna o ka Isseraela: e hookani oukou i ka pu, a e olelo aku, E ola ke alii Solomona.
- ³⁵ Alaila e hele mai oukou mamuli ona, i hele mai oia e noho maluna o ko'u nohoalii; no ka mea, e lilo oia i alii ma ko'u hakahaka, a ua hoomaopopo ae nei au ia ia i alii maluna o Isseraela a maluna hoi o Iuda.
- ³⁶ Alaila olelo aku la o Benaia ke keiki a Iehoiada i ke alii, i aku la, Amene; a e olelo hoi pela Iehova ke Akua o kuu haku ke alii.
- ³⁷ Me Iehova i noho pu ai me kuu haku ke alii, pela e noho pu ai oia me Solomona, a e hoonui ae i kona nohoalii i ka nohoalii o kuu haku ke alii Davida.
- ³⁸ Alaila hele aku la Zadoka ke kahuna, a me Natana ke kaula, a me Benaia ke keiki a Iehoiada, a me na Kereta a me na Pelita a hooholo lakou ia Solomona maluna o ka hoki o ke alii o Davida, a lawe ae la lakou ia ia i Gihona.
- ³⁹ Lawe ae la o Zadoka ke kahuna i ka pepeiaohao aila mailoko ae o ka halelewa, a poni ae la ia Solomona. A hookani ae la lakou i ka pu; i ae la hoi na kanaka a pau, E ola ke alii Solomona.
- ⁴⁰ A hoi mai la na kanaka a pau mamuli ona, hookiokio ae la na kanaka me na ohe, a

hauoli ae la lakou me ka olioli nui, a haalulu
ae la ka honua i ko lakou leo.

- ⁴¹ Lohe ae la hoi o Adonilia a me na hoaai a pau me ia, i ka pau ana o ka lakou ahaaina. A lohe o Ioaba i ke kani ana o ka pu, i ae la ia, No ke aha la keia walaau ana o ke kulanakauhale haunaele?
- ⁴² A i kana olelo ana, aia hoi, hiki ae la o Ionatana ke keiki a Abiatara, ke kahuna: i mai la o Adonilia ia ia, E komo mai oe, no ka mea, he kanaka ikaika no oe, a ke lawe mai nei oe i ka olelo maikai.
- ⁴³ Alaila olelo ae la o Ionatana, i ae la ia Adonilia, Oiaio, ua hoolilo ae nei ko kakou haku ke alii o Davida ia Solomona i alii.
- ⁴⁴ A ua hoouna ke alii me ia ia Zadoka ke kahuna, a me Natana ke kaula, a me Benaya ke keiki a Iehoiada, a me na Kereta, a me na Pelita, a ua hooholo lakou ia ia maluna o ka hoki a ke alii.
- ⁴⁵ A ua poni ae la o Zadoka ke kahuna, a me Natana ke kaula ia ia i alii ma Gihona, a ua hoi mai lakou mailaila mai e hauoli ana, i halulu ai ke kulanakauhale. Oia ka walaau a oukou i lohe ai.
- ⁴⁶ Ke noho nei no hoi o Solomona maluna o ka nohoalii o ke aupuni.
- ⁴⁷ A ua hele mai hoi na kauwa a ke alii e hoomaikai i ko kakou haku ke alii Davida, e i ana, E hoonui ke Akua i ka maikai o ka inoa o Solomona i kou inoa, a e hoopakela i kona nohoalii mamua o kou nohoalii. A kulou iho ke alii maluna iho o kona wahi moe.
- ⁴⁸ Peneia hoi i olelo mai ai ke alii, E hoomaikaiia o Iehova ke Akua o Isaela ka mea nana i

haawi mai i keia la e noho kekahi maluna
o ko'u nohoalii, a e ike ana hoi kuu mau
maka.

⁴⁹ Makau iho la na hoaai a pau na mea me Adoniaa,
ku ae la lakou a hele kela kanaka keia
kanaka i kona wahi e hele ai.

⁵⁰ Makau iho la hoi o Adoniia imua o Solomona,
ku ae la ia, a hele aku, a lalau ae la i na
pepeiaohao o ke kuahu.

⁵¹ Ua haiia mai ia Solomona peneia, Aia hoi,
ke makau mai nei o Adoniia i ke alii ia
Solomona, no ka mea, ea, ua lalau oia i
na pepeiaohao o ke kuahu, e olelo ana,
E hoohiki ke alii Solomona no'u i keia la,
aole ia e pepehi mai i kana kauwa me ka
pahikaua.

⁵² Olelo mai la hoi o Solomona, Ina e hoike oia ia
ia iho he kanaka hoopono, aole e haule i ka
honua kekahi oho ona, aka, ina i loaa ka
hewa iloko ona, e make no ia.

⁵³ Alaila hoouna ae la ke alii Solomona, a lawe mai
lakou ia ia mailuna mai o ke kuahu. Hele
mai la ia a kulou iho la i ke alii ia Solomona,
a olelo mai la Solomona ia ia, E hele oe i kou
hale.

2

¹ HOOKOKOKE mai la hoi na la o Davida e make
ai; a kauoha mai la oia ia Solomona i kana
keiki, i mai la,

² Ke hele nei au i ka aoao o ko ka honua a pau: e
hooikaika oe, a e hookanaka hoi;

- ³ A e malama oe i ke kauoha a Iehova kou Akua, e hele ma kona mau aoao, me ka malama i kona mau kapu, a me kana mau kauoha, a me kona mau kanawai, a me kana mau olelo me ia i kakauia'i ma ke kanawai ia Mose, i pomaikai oe ma na mea a pau au e hana aku ai, a i na wahi a pau e huli ae ai oe:
- ⁴ I hooko iho ai o Iehova i kana olelo ana i olelo mai ai no'u, i ka i ana mai, Ina e malama kau mau keiki i ko lakou aoao, e hele imua o'u me ka oiaio, me ko lakou naau a pau, a me ko lakou uhane a pau, aole oe e nele i ke kanaka ole (wahi ana) e noho maluna o ka nohoalii o ka Israela.
- ⁵ A ua ike no hoi oe i ka mea a Ioaba ke keiki a Zeruia i hana mai ai ia'u, a me ka mea ana i hana'ku ai i na luna elua o ka poe koa o ka Israela, ia Abenera ke keiki a Nera, a ia Amasa ke keiki a Ietera; ua pepehi oia ia laua, a ua hookahe oia i ke koko o ke kaua i ka wa maluhia, ua kau hoi oia i ke koko o ke kaua ma kona kaei i kaeiia'i kona puhaka, a ma kona mau kamaa i hookomoia'i kona mau wawae.
- ⁶ Nolaila e hana oe mamuli o kou akamai, i ole ai e iho maluhia kona poohina i ka luakupapau.
- ⁷ Aka, e lokomaikai aku oe i na keiki a Barezilai no Gileada, o lakou kekahi o ka poe e ai ana ma kou papaaaina; no ka mea, pela lakou i hele mai ai ia'u i ko'u hee ana imua o Abesaloma kou hoahanau.
- ⁸ Aia hoi me oe o Simei ke keiki a Gera ka Beniamina no Bahurima, ua hoino wale mai oia ia'u me ka olelo hoino loa i ka la i hele aku ai au i Mahanaima; aka, ua hele ae ia e halawai me au ma Ioredane, a hoohiki aku

la au nona, ma o Iehova la, i aku la, Aole au e pepehi aku ia oe me ka pahikaua.

⁹ Ano hoi, mai hoapono oe ia ia, no ka mea, he kanaka naauao no oe, a ua ike oe i kau mea e pono ai ke hana aku ia ia; aka, e hooihoe i kona poohina ilalo i ka luakupapau me ke koko.

¹⁰ Alaila hiamoe iho la o Davida me kona mau makua, a ua kanuia ma ke kulanakauhale o Davida.

¹¹ A o na la i alii ai o Davida maluna o ka Israela he kanaha mau makahiki ia; ma Heberona i alii ai oia i na makahiki ehiku, a ma Ierusalema i alii ai oia i na makahiki he kanakolukumamakolu.

¹² Alaila noho iho la o Solomona maluna o ka nohoalii o kona makuakane, a ua hooku paa loa ia kona aupuni.

¹³ Alaila hele mai la o Adonii a keiki a Hagita io Bateseba la ka makuwahine o Solomona. Ninau aku la oia, Ua hele mai nei anei oe me ke aloha? I mai la ia, Me ke aloha.

¹⁴ A olelo mai la hoi ia, He wahi manao ka'u e olelo aku ai ia oe. A i aku la kela, E olelo mai.

¹⁵ Olelo mai la ia, Ua ike no oe, ia'u no ke aupuni, a ua kau na maka o ka Israela a pau ia'u i alii ae au; aka, ua hoohuliia ke aupuni, a ua lilo ae nei i ko'u hoahanau: no ka mea, nona no ia, mai Iehova mai.

¹⁶ Ano la hoi, hookahi mea a'u e noi ai ia oe, mai hoole mai oe ia'u. I aku la oia ia ia, E olelo mai no.

- ¹⁷ I mai la hoi oia, Ke noi aku nei au ia oe e olelo oe ia Solomona ke alii, (no ka mea aole oia e hoole ia oe,) e haawi mai oia ia Abisaga no Sunama ia'u i wahine.
- ¹⁸ I aku la o Bateseba, He pono, e olelo aku no wau i ke alii, nou.
- ¹⁹ Hele aku la o Bateseba i ke alii ia Solomona, e i aku ia ia no Adoniia. Ku ae la hoi ke alii iluna e halawai me ia, a kulou iho la ia ia, a noho iho la ma kona nohoalii, a ua hoonoho iho i ka noho no ka makuwahine o ke alii; a noho iho oia ma kona lima akau.
- ²⁰ Alaila i ae la ia, Hookahi mea iki ka'u e noi aku ai ia oe; mai hoole mai oe ia'u. A olelo ae la ke alii ia ia, E olelo mai no oe, e kuu makuwahine, no ka mea, aole au e hoole aku ia oe.
- ²¹ I ae la kela, E haawiia'ku o Abisaga no Sunama ia Adoniia kou hoahanau i wahine.
- ²² Olelo ae la ke alii Solomona, i ae la i kona makuwahine, No ke aha la oe i noi mai nei ia Abisaga no Sunama na Adoniia? E noi mai oe i ke aupuni kekahi nona, no ka mea, o ko'u kaikuaana no ia, nona hoi, a no Abiatara ke kahuna, a no Ioaba ke keiki a Zeruia.
- ²³ Alaila hoohiki Solomona ke alii ma o Iehova la, i aku la, Me ia e hana mai ai ke Akua ia'u, a e hui hou, ke olelo ku e ole o Adoniia i keia olelo i kona ola iho.
- ²⁴ Ano hoi, me ke ola ana o Iehova, ka mea nana i hooku paa mai ia'u, a i hoonoho ia'u ma ka nohoalii o Davida ko'u makuakane, ka mea nana i hana i hale no'u, e like me kana olelo hoopomaikai, e make no o Adoniia i keia la.

- 25 Kena ae la o Solomona ke alii ma ka lima o Benaia ke keiki a Iehoiada; lele aku la oia ia ia a make ia.
- 26 A olelo mai la ke alii ia Abiatara ke kahuna, E hele aku oe i Anatota, i kau mau mahinaai ponoi; no ka mea, he pono ke make oe: aka, aole au e pepehi aku ia oe i keia mau la, no ka mea, ua hali oe i ka pahuberita o ka Haku Iehova imua o Davida ko'u makuakane, a ua hookaumahaia oe i na mea a pau i hookaumahaia'i ko'u makuakane.
- 27 Pela i kipaku aku ai o Solomona ia Abiatara mai kona kahuna ana no Iehova, i hooko i ka olelo a Iehova ana i olelo ai no ka ohana a Eli ma Silo.
- 28 Alaila hiki ae la ka olelo ia Ioaba; no ka mea, ua huli ae o Ioaba mamuli o Adonija aole nae ia i huli mamuli o Abesaloma: a holo aku la o Ioaba i ka halelewa o Iehova, a lalau ae la i na pepeiaohao o ke kuahu.
- 29 A ua haiia'ku i ke alii ia Solomona, Ua holo aku o Ioaba i ka halelewa o Iehova, aia hoi ia ma ke kuahu. Alaila kena ae la o Solomona ia Benaia ke keiki a Iehoiada, i ae la, E hele oe e lele aku ia ia.
- 30 A hele aku la o Benaia i ka halelewa o Iehova, i aku la ia ia, Ke i mai nei ke alii, E hele mai oe. I mai kela, Aole, aka, maanei au e make ai. A hoi hoike o Benaia i ke alii, i aku la, Pela i olelo mai ai o Ioaba, a pela i hoike mai ai oia ia'u.
- 31 A i mai la ke alii ia ia, E hana aku oe e like me kana i olelo mai ai, e lele aku ia ia a e kanu ia ia, i lawe aku oe i ke koko hala ole a Ioaba i

hookahe ai, mai o'u aku nei, a mai ka ohana
aku a ko'u makuakane.

- ³² A e hoihoi aku o Iehova i kona koko maluna o ke
poo ona, o ka mea i lele aku i na kanaka elua
ua oi aku ko laua pono me ko laua maikai
mamua o kona, a pepehi aku la ia laua me
ka pahikaua, me ka ike ole o Davida ko'u
makuakane, ia Abenera ke keiki a Nera, ka
luna o ka poe koa o ka Israela, a me Amasa
ke keiki a Ietera ka luna o ka poe koa o ka
Iuda.
- ³³ Nolaila e hoi ae ko laua koko maluna o ke poo
o Ioaba, a maluna o kana mau keiki a mau
aku; aka, maluna o Davida a me kana mau
keiki, a me kana ohana, a me kona nohoalii,
e kau mau loa'i ka pomaikai mai ka Haku
mai.
- ³⁴ Hele aku la hoi o Benaia ke keiki a Iehoiada, lele
aku la ia ia, a pepehi aku ia ia; a ua kanuia
oia iloko o kona hale i ka waonahele.
- ³⁵ A hoonoho ae la ke alii ia Benaia ke keiki a
Iehoiada, iloko o kona wahi maluna o ka
poe koa, a hookomo ae la ke alii ia Zadoka
i ka hakahaka o Abiatara.
- ³⁶ Hoouna ae la ke alii e kii ia Simei, a i ae la ia
ia, E kukulu oe i hale nou ma Ierusalema,
a malaila e noho ai, mai hele aku oe mai ia
wahi aku.
- ³⁷ No ka mea, eia, i kou la e puka aku ai maluna o
ke kahawai Kederona, e ike oe he oiaio no e
make io no oe, a maluna o kou poo iho kou
koko.

- 38** Olelo aku la hoi o Simei i ke alii, he pono ka olelo; a e like me ka olelo a kuu haku ke alii, pela no e hana aku ai kau kauwa. A noho iho la o Simei ma Ierusalema i na la he nui.
- 39** Eia kekahi, i ka pau ana o na makahiki ekolu, holo malu aku la elua o na kauwa a Simei ia Akisa ke keiki a Maaka ke alii o Gata: a olelo mai la lakou ia Simei, i mai la, Aia kau mau kauwa ma Gata.
- 40** Ku ae la hoi o Simei, a kau aku la i ka noholio maluna o kona hoki a holo aku la i Gata, ia Akisa e imi ana i kana mau kauwa; a holo no Simei a hoihoi mai i kana mau kauwa mai Gata mai.
- 41** Haiia'ku la ia Solomona, ua hele aku o Simei mai Ierusalema aku i Gata, a ua hoi mai.
- 42** Hoouna ae ke alii e kii ia Simei, a i ae la ia ia, Aole anei na'u i hoohiki ai oe ma o Iehova la, a i olelo aku au ia oe penei, I kou la e puka aku ai a hele mawaho i kahi e, e ike oe he oiao, e make io no oe? a olelo mai la oe ia'u, He pono ka olelo a'u e lohe nei.
- 43** No ke aha la hoi i malama ole ai oe i kau mea i hoohiki ai no Iehova, a me ke kauoha a'u i kauoha aku ai ia oe?
- 44** Olelo hou ae la ke alii ia Simei, Ua ike no oe i ka hewa a pau i maopopo i kou naau, au i hana mai ai ia Davida ko'u makuakane: nolaila e hoihoi aku o Iehova i kou hewa maluna iho o kou poo;
- 45** A e pomaikai Solomona ke alii, a e hooku paa mau loa ia ka nohoalii o Davida ma ke alo o Iehova.
- 46** Alaila kena ae la ke alii ia Benaia ke keiki a Iehoiada, a puka ae ia, a lele aku ia ia a make

ia. A ua hoopaaia ke aupuni iloko o ka lima o Solomona.

3

- ¹ HOOHUI ae la o Solomona me Parao ke alii o Aigupita, a lawe ae la oia i ke kaikamahine a Parao, a lawe mai ia ia i ke kulanakauhale o Davida, a paa ia ia kona hale iho, a me ka hale o Iehova, a me ka pa o Ierusalema a puni.
- ² Mohai aku la nae na kanaka ma na wahi kiekie, no ka mea, aole i kukuluia ka hale no ka inoa o Iehova a hiki ia mau la.
- ³ Ua aloha aku no hoi o Solomona ia Iehova, e hele ana ma na kauoha a Davida kona makuakane, mohai aku la nae oia a kuni aku la hoi i ka mea ala ma na wahi kiekie.
- ⁴ Hele aku la ke alii i Gibeona e kaumaha aku malaila, no ka mea, he wahi kiekie nui no hoi ia; hookahi tausani mohaikuni ka Solomona i mohai ai ma kela kuahu.
- ⁵ A ma Gibeona i ikeia'ku ai o Iehova e Solomona, ma ka moe uhane i ka po, a olelo mai la ke Akua, E noi mai oe i ka'u mea e haawi aku ai ia oe.
- ⁶ I aku la o Solomona, Nui mai la kou lokomaikai i kau kauwa ia Davida ko'u makuakane, e like me kona hele ana imua ou ma ka oiaio, a me ka pololei, a me ke kupono o ka naau ia oe; a ua malama hoi oe i keia lokomaikai nui nona, i kou haawi ana mai i keiki nana e noho maluna o kona nohoalii, me neia i keia la.

- ⁷ Ano hoi e Iehova ko'u Akua, ua hoolilo mai oe i kau kauwa nei i alii ma kahi o Davida ko'u makuakane: he keiki uuku wale no au: aole ike au i ka hele aku, aole hoi i ka hoi mai.
- ⁸ A iwaewa konu kau kauwa nei o kou poe kanaka, au i koho mai ai, he lahuikanaka nui aole hiki ke helu, aole e pau i ka heluia no ka lehulehu loa.
- ⁹ Nolaila, e haawi mai oe i naauao i kau kauwa nei e hoomalu i kou poe kanaka, i hiki ia'u ke hookaaawale mawaena o ka pono a me ka hewa; no ka mea, owai la ka mea e hiki ia ia ke hooponopono i kou lahuikanaka he nui loa me neia.
- ¹⁰ Pono iho la ka olelo imua o ka Haku, o ko Solomona noi ana i keia mea.
- ¹¹ Olelo mai la ke Akua ia ia, No kou noi ana mai i keia mea, aole i noi mai i na la he nui nou, aole hoi i noi mai i waiwai nui nou, aole hoi i noi mai e make kou poe enemi; aka, ua noi mai oe i naauao nou i ike i ka hooponopono;
- ¹² Eia hoi, ua hana no au e like me kau olelo; eia no hoi, ua haawi aku au i ka naau akamai a me ka ike nou, i ole mea i like ai me oe mamua ou, aole hoi mahope aku ou e ku mai ai kekahi e like me oe.
- ¹³ A ua haawi hou aku au ia oe i ka mea au i noi ole mai ai, i ka waiwai nui, a me ka hanohano, i ole mea like me oe iwaewa o na lii i kou mau la a pau.
- ¹⁴ A ina e hele oe ma ko'u mau aoao, a e malama mai i ko'u mau kanawai, a me ka'u mau kauoha, e like me ka hele ana o Davida kou

makuakane, alaila e hooloihi aku au i kou mau la.

- ¹⁵ Ala ae la o Solomona, aia hoi, he moe uhane. A hele mai la ia i Ierusalem, a ku iho la imua o ka pahuberita o ka Haku, a kaumaha aku la i na mohaikuni, a kaumaha aku la i na mohaihoomalu, a hana hoi ia i ka ahaaina na kana mau kauwa a pau.
- ¹⁶ Alaila hele mai la na wahine moe kolohe elua i ke alii, a ku mai la laua imua ona.
- ¹⁷ A olelo aku la kekahi wahine, E kuu haku, e noho ana maua me keia wahine ma ka hale hookahi, a hanau keiki au me ia iloko o ka hale.
- ¹⁸ Eia kekahi, i ke kolu o ka la mahope mai o ko'u hanau ana, hanau mai la keia wahine kekahi; aohe mea e me maua iloko o ka hale, o maua wale no ka iloko o ka hale.
- ¹⁹ Make iho la ke keiki a keia wahine i ka po, no ka mea, ua moe ae oia nei maluna ona.
- ²⁰ A ala ae la ia i ka waena o ka po, a lawe aku la i ka'u keiki mai kuu aoao aku, i ka wa i hiamoe ai kau kauwawahine, a hoomoe iho ia ia ma kona poli, a hoomoe mai la hoi i kana keiki make ma ko'u poli.
- ²¹ A i kuu ala ana i kakahiaka e hanai i kuu keiki i ka waiu, aia hoi, ua make; aka, i ko'u nana ana ia ia i ke ao, aia hoi, aole ia o ka'u keiki a'u i hanau ai.
- ²² A olelo ae la kekahi wahine, Aole, aka, na'u no ke keiki ola, a nau ke keiki make; a olelo ae keia, Aole, aka, nau ke keiki make, a na'u no hoi ke keiki ola. Pela no i olelo ai ua mau wahine la imua o ke alii.

- ²³ I mai la ke alii, ke i mai nei kekahia, Na'u keia keiki ka mea ola, a nau ke keiki make; a ke i mai nei keia, Aole, aka, nau ke keiki make, a na'u no ke keiki ola.
- ²⁴ Olelo mai la hoi ke alii, E lawe mai i ka pahikaua ia'u. A lawe aku la lakou i ka pahikaua ma ke alo o ke alii.
- ²⁵ Kauoha mai la ke alii, E mahele i ke keiki ola i elua, a e haawi i kekahia hapalua i kekahia, a i kekahia hapalua i kekahia.
- ²⁶ Alaila olelo aku ka wahine nana ke keiki ola i ke alii, no ka mea, ua hu ke aloha o kona naau i kana keiki, iaku la hoi ia, E kuu haku, e haawi i ke keiki ola ia ia nei, aole loa e pepehi ia ia. Aka, olelo mai kela, Aole ia ia'u, aole hoi ia oe, e mahele ae ia ia.
- ²⁷ Kauoha mai la ke alii, i mai la, E haawi aku i ke keiki ola ia ia la, aole loa e hoomake ia ia; oia kona makuwahine.
- ²⁸ A lohe ae la ka Israela a pau i ka hooponopono ana a ke alii i hana'i, a weliweli lakou imua o ke alii; no ka mea, ua ike lakou, o ke akamai o ke Akua ka iloko ona e hooponopono ai.

4

- ¹ PELA i alii ai o Solomona maluna o ka Israela a pau.
- ² Eia hoi kona mau luna, o Azaria ke keiki a Zadoka ke kahuna.
- ³ O Elihorepa a me Ahia na keiki a Sisa he mau kakauolelo; o Iehosapata ke keiki a Ali-huda, ke kakauhana.

- ⁴ A o Benaia ke keiki a Iehoiada, maluna o ka poe koa; a Zadoka a me Abiatara he mau kahuna pule laua.
- ⁵ A o Azaria ke keiki a Natana maluna o na luna; a o Zabuda ke keiki a Natana, kekahi luna punahele a ke alii.
- ⁶ A o Ahisara maluna o ka hale; o Adonirama ke keiki a Abeda maluna o ka waiwai hookupu.
- ⁷ A ia Solomona na luna he umikumamaluia maluna o ka Iseraela a pau, na mea hoomakaukau i ka ai na ke alii a na ko kona hale, kela kanaka keia kanaka i kona malama o ka makahiki i hoomakaukau ai.
- ⁸ Eia ko lakou mau inoa, o Benehura ma ka mauna o Operaima;
- ⁹ O Benedekera, ma Makaza, a me Salabima, a me Betesemeta, a me Elonabetehanana.
- ¹⁰ O Beneheseda ma Anibota, ia ia o Soko, a me ka aina a pau o Hepera.
- ¹¹ O Benabinadaba ma ka aina a pau o Dora, ia ia o Tapata ke kaikamahine a Solomona i wahine.
- ¹² A o Baana ke keiki a Ahiluda, ia ia Taanaka, a me Megido, a me Beteseana a pau, e pili ana i Zaretana, malalo o Iezereela, mai Bete-seana aku a hiki i Abelamahola a ma o aku o Iokeneama.
- ¹³ A o Benengebera ma Ramota Gileada, ia ia na kauhale o Iaira ke keiki a Manase na wahi ma Gileada; ia ia hoi ka aina o Aregoba kahi ma Basana, he kanaono na kulanakauhale nui me na pa, a me na kaola keleawe:
- ¹⁴ A o Ahinadaba ke keiki a Ido, ia ia Mahanaima:

- 15 Ahimiaza ma Napetali; ua lawe hoi oia ia Basemata, ke kaikamahine a Solomona i wahine;
- 16 A o Baana ke keiki a Husai ma Asera a me Alota;
- 17 O Iehosapata ke keiki a Parua ma Isakara;
- 18 O Simei ke keiki a Ela ma Beniamina;
- 19 O Gebera ke keiki a Uri ma ka aina o Gileada, ka aina o Sihona ke alii o ka Amora, a me Oga ke alii o Basana; oia wale no ka luna ma kela aina.
- 20 He lehulehu ka Iuda, a me ka Israela, e like me ka one ma kahakai i ka nui, e ai ana, a e inu ana, a e hoolealea ana.
- 21 A ua alii ae la o Solomona maluna o na aupuni a pau mai ka muliwai a hiki i ka aina o ko Pilisetia, a i ka mokuna o Aigupita; a lawe mai la i na makana, a malama lakou ia Solomona i na la a pau o kona ola ana.
- 22 A o ka ai na Solomona i ka la hookahi, he kanakolu kora palaoa maikai, a me na kora huita wali he kanaono:
- 23 O na bipikauo kupaluia he umi, a me na bipikauo mai ke kula mai he iwakalua, a me na hipa hookahi haneri, a okoa hoi na dia, a me na anetelopa, a me na bufalo, a me na manu momona.
- 24 No ka mea, ia ia ke aupuni ma keia aoao a pau o ka muliwai, mai Tipesa a hiki i Aza, maluna oia o nalii a pau ma keia aoao o ka muliwai: a he malu kona ma na aoao a puni ia.
- 25 Noho maluhia ae la o ka Iuda a me ka Israela, kela kanaka keia kanaka, malalo o kona

kumuwaina iho a malalo o kona laaufiku iho, mai Dana a Bereseba, i na la a pau o Solomona.

- 26 Ia Solomona na wahi e ku ai na lio, he kanaha tausani, no kona mau kaa, a me na kanaka hololio he umikumamalua haneri.
- 27 A ua hoomakaukau kela mau luna i ai na Solomona ke alii, a na ka poe a pau i hele mai i ka papaaaina o Solomona ke alii, kela kanaka keia kanaka i kona malama, aole nele iki lakou.
- 28 Ka hua bale hoi a me ka mauu na na lio, me na lio holo, ka lakou i lawe mai ai i kahi o lakou, kela kanaka keia kanaka e like me kana kauoha.
- 29 A haawi mai la ke Akua i ke akamai ia Solomona, a me ka naauao he nui loa, a me ka nui ana o ka naau, e like me ka one ma kahakai.
- 30 A o ko Solomona akamai, ua oi aku ia mamua o ke akamai o na kamaaina a pau o ka hikina, a me ke akamai a pau o Aigupita.
- 31 No ka mea, ua oi aku kona akamai mamua o ko na kanaka a pau, mamua o ko Etana o ka Ezera, a me ko Hemana, a me ko Kalekola, a me ko Dareda na keiki a Mahola: a ua kaulana oia ma na lahuikanaka a puni.
- 32 A ua olelo mai la oia i na olelo akamai ekolu tausani, a o kana mau mele, hookahi tausani ia a me kumamalima.
- 33 A ua olelo mai oia i na laau, mai ka laau Kedera ma Lebanonona a hiki i ka husopa, e kupu ana mailoko ae o ka pa: a olelo mai la hoi oia no na holoholona, a me na manu, a me na mea kolo, a me na ia.

³⁴ Hele mai la hoi ko na lahuikanaka a pau e
hoolohe i ke akamai o Solomona, mai na lii
a pau o ka honua, i lohe i kona akamai.

5

- ¹ HOOUNA mai la o Hirama ke alii o Turo i kaua
mau kauwa io Solomona la, no ka mea, ua
lohe oia i ko lakou poni ana ia ia i alii ma ka
hakahaka o kona makuakane; no ka mea,
he hoaaloha mau o Hirama no Davida.
- ² Hoouna aku la hoi o Solomona io Hirama la, i aku
la,
- ³ Ua ike no oe i ko'u makuakane ia Davida aole i
hiki ia ia ke kukulu i ka hale no ka inoa o
Iehova kona Akua, no ua kaua e puni ana ia
ia ma na aoao a pau, a hiki i ka manawa i
waiho iho ai ke Akua ia lakou malalo ae o
kona mau kapuwai
- ⁴ Aka, ano la, ua haawi mai nei Iehova ko'u Akua i
ka maha a puni, i ole he mea ku e, aole hoi
mea e popilikia ai.
- ⁵ Eia no hoi, ke manao nei au e kukulu i ka hale
no ka inoa o Iehova ko'u Akua, mamuli
o ka Iehova i olelo mai ai ia Davida ko'u
makuakane, i ka i ana mai, O kau keiki au e
hoonoho ai maluna o kou nohoalii ma kou
wahi, oia ke hana mai i hale no ko'u inoa.
- ⁶ Ano hoi e kauoha ae oe e kalai lakou i mau laau
kedera no'u, mai Lebanonona mai; a o ka'u
poe kauwa kekahi pu me kau poe kauwa;
a e uku aku wau ia oe no kau poe kauwa e
like me kau olelo a pau; no ka mea, ua ike
oe, aohe mea iwaena o makou e akamai i ke
kalai laau e like me ko Sidona.

- ⁷ Eia kekahī, i ka lohe ana o Hirama i na olelo a Solomona, olioli nui ae la ia, i iho la hoi ia, E hoomaikaiia o Iehova i keia la, ka mea i haawi mai ia Davida i keiki naauao maluna o keia lahuikanaka nui.
- ⁸ Hoouna mai la o Hirama io Solomona la, i mai la, Ua noonoo ae nei au i na mea au i kauleo mai ai ia'u; a e hana no wau i kau mea e makemake ai a pau i na laau kedera a me na laau kaa.
- ⁹ E lawe ae ka'u poe kauwa mai Lebanonā ae a kahakai; a na'u no e alo aku ia mau mea ma ke kai, ma na huina laau lana, i kahi au i hoomaopopo mai ai, a e hoopae aku au ia lakou malaila, a e lawe ae oe; a e hooko ae i ko'u makemake i ka haawi ana mai i ka ai na ko ka hale o'u.
- ¹⁰ Pela i haawi mai ai o Hirama i na laau kedera a me na laau kaa e like me kona makemake a pau.
- ¹¹ A haawi aku la o Solomona ia Hirama i na kora hua palaoa he iwakalua tausani i ai na ko kona hale, a me na kora aila maemae he iwakalua. Pela i haawi ai o Solomona ia Hirama i kela makahiki keia makahiki.
- ¹² Haawi mai la hoi o Iehova i ka naauao ia Solomona e like me kana olelo hoopo-maike ia ia: a he kuikahi like ko Hirama me Solomona, a hana pu iho la laua i berita.
- ¹³ A auhau ae la o Solomona ke alii i ka Israela a pau, a o ka auhau he kanakolu tausani kanaka.
- ¹⁴ Hoouna aku la oia ia lakou i Lebanonā he umi tausani i ka malama, ma na papa; hookahi malama i noho ai lakou ma Lebanonā, a

elua malama i noho ai lakou ma ko lakou
mau hale iho; a o Adonirama māluna o keia
auhau.

- 15** Ia Solomona he kanahiku tausani kanaka halihali i na mea hali, a he kanawalu tausani mea kalai ma na kuahiwi.
- 16** Okoa na luna nui o ko Solomona mau luna, na mea maluna o ka hana, ekolu tausani me na haneri ekolu o na luna i hooponopono i na kanaka e hana ana i ka hana.
- 17** Kauoha mai la ke alii, a lawe mai la lakou i na pohaku nui, na pohaku he nui ke kumukuai, na pohaku kalaiia e hoonoho iho i ke kumu o ka hale.
- 18** Na ko Solomona poe hanahale, a me ko Hirama poe hanahale i kalai, a me ko Gibela. Pela lakou i hoomakaukau ai i na laau a me na pohaku e hana'ku ai i ka hale.

6

- 1** EIA kekahī, i ka makahiki eha haneri me kanawalu mahope mai o ka puka ana mai o na mamo a Iseraeia mai ka aina mai o Aigupita, i ka ha o ka makahiki o ko Solomona alii ana maluna o ka Israela, i ka malama o Zifa, oia ka malama alua, i hoomaka ae ai oia e kukulu i ka hale no Iehova.
- 2** A o ka hale a Solomona ke alii i hana aku ai no Iehova, kanaono kubita kona loa, a o kona laula he iwakalua kubita, a o kona kiekie he kanakolu kubita.
- 3** A o ka lanai mamua o ka luakini o ka hale, he iwakalua kubita ka loa e like me ka laula

o ka hale, he umi kubita hoi kona laula
mamua o ka hale.

⁴ Hana iho la oia i na puka makani he ololi kahi
malamalama.

⁵ Ma ka paia o ka hale a puni i hana'i oia i na keena
a puni na paia o ka hale, o ka luakini a me
kahi o olelo ai; a hana ae oia i na papa a
puni.

⁶ O ke keena lalo elima kubita ka laula, a o ka
waena, eono kubita ka laula, a o ko kolu
ehiku kubita ka laula: no ka mea, mawaho
o ka hale i hana i oia i na anuu a puni, i ole e
hoopaaia na kaola iloko o na paia o ka hale.

⁷ A o ka hale i ke kukuluia'na, ua kukuluia'e ia i
ka pohaku i hooponoponoia mamua o ka
laweia ilaila, aole ka hamare aole hoi ke koi,
aole mea hao i loheia maloko o ka halo i
kona kukuluia.

⁸ O ka pukakomo o ko keena waena, aia ma ka
aoao akau ia o ka hale: a ma na anuu wili
i pii ai lakou a loko o ko keena waena, a
mailoko ae o ka waena iloko o ke kolu.

⁹ Pela ia i hana'i i ka hale a paa, a kau maluna i na
kaola a me na papa kedera.

¹⁰ Alaila hana iho la i na keena e pili ana i ka hale
a pau, elima kubita ke kiekie, a kau iho la
lakou ma ka hale me na laau kedera.

¹¹ A hiki mai la ka olelo a Iehova ia Solomona
peneia,

¹² O keia hale au e hana nei, ina e helo oe ma ko'u
mau kapu, a e hana ma ko'u mau kanawai,
a e malama hoi i ka'u mau kauoha a pau o
helo ma ia mau mea, alaila e nooko iho au i

ka'u olelo me oe a'u i olelo aku ai ia Davida
i kou makuakane.

¹³ A e noho no au iwaena o na mamo a Iseraela,
aole hoi e haalele aku i ko'u poo kanaka i ka
Iseraela.

¹⁴ Pela i hana'i o Solomona i ka hale a paa ia ia.

¹⁵ A hana iho la oia i koloko o na paia me na papa
kedera, mai ka papahehi o ka hale a luna
o na paia; a kau ai oia i ka laau maloko, a
hooahi i ko lalo o ka halo mo na papa kaa.

¹⁶ A hana iho la oia, ma na aoao o ka hale, he
iwakalua kubita, mai ke keehana a hiki i na
paia i na papa kedera; hana iho la oia no ia
maloko, i wahi e olelo ai, i wahi hoano loa.

¹⁷ He kanaha kubita ka loa o ka hale oia ka luakini
i mua ona.

¹⁸ A o ke kedera o ka hale maloko, ua kalakalaiia
he mau kaukama a me na pua mohala: he
kedera wale no, aole pohaku i ikeia.

¹⁹ A o kahi e olelo ai, oia kana i hoomakaukau ai
ma ka hale maloko, e waiho malaila i ka
pahuberita o Iehova.

²⁰ A o kahi e olelo ai ma ka mua he iwakalua kubita
ka loa, a he iwakalua kubita ka laula, a he
iwakalua kubita ke kiekie ona: a hooahi ae
la oia ia me ko gula maemae, a hooahi ae la
i ko kuahu kedera.

²¹ Hoouhi ae la o Solomona i ka hale maloko me ke
gula maemae; hana iho la oia i ka paku me
na kaula gula ma ke alo o kahi e olelo ai, a
hooahi ae la mo ko gula.

²² A o ka hale a pau kana i hoouhi ai me ke gula a
hiki i ka hoopaa ana i ka hale a puni, a me ke

kuahu okoa e pili ana i kahi e olelo ai kana i hoouhi ai me ke gula.

- 23 A maloko o kahi e olelo ai, i hana'i oia i na keruba elua he laau oliva, he umi kubita ke kiekie.
- 24 Elim a kubita kekah i eheu o ke keruba, a elim a kubita kekah i eheu o ko keruba; mai ka welau o kekah i eheu a ka welau o kekah i eheu he umi kubita.
- 25 He umi kubita kekah i keruba. Hookahi ana o na keruba elua, ua like ko laua nui.
- 26 Ke kiekie o kekah i keruba he umi kubita, a pela ko kekah i keruba.
- 27 Hooku ae la hoi oia i na keruba maloko o ka hale iloko loa; a hoholaia'e la na eheu o na keruba, i pa ka eheu o kekah i ka paia, a pa ka eheu o kekah i keruba i kekah i paia, a iwaena konu o ka hale i pa ai kekah i eheu i kekah i eheu.
- 28 A hoouhi ao la hoi oia i na keruba me ke gula.
- 29 A kalakalai ae la hoi oia i na paia a pau o ka hale a puni i na kii kalaia o na keruba, a me na laau pama, a me na pua mohala, maloko a mawaho.
- 30 A o ka papakeehana o ka hale kana i hoouhi ai me ke gula maloko a mawaho hoi.
- 31 A no ka puka o kahi e olelo ai, i hana'i oia i na pani laau oliva, a o ka lapauila a me na laauku, o ka hapalima no ia.
- 32 He laau oliva na pani elua, a kalai iho la oia ma ia mau mea i ke kalakalai ana o na keruba, a me na laau pama, a me na pua mohala, a hoouhi ae la ia mau mea me ke gula, a kapili

ae la hoi i ke gula ma na keruba a me na laau pama.

³³ Pela hoi i hana'i oia no ka puka o ka luakini i na laauku oliva he hapaha.

³⁴ A o na pani elua he laau kaa; a o na aoao elua o kekahi pani e pelu ana ia, a o na aoao elua o ke kahi pani, e pelu ana no ia.

³⁵ Kalai ae la hoi oia malaila i na keruba, a me na laau pama, a me na pua mohala; a hoouhi hoi me ke gula i hooku pono ia i ka mea i kalaiia.

³⁶ Hana iho la hoi oia i ka pahale loko, me na lalani ekolu o na pohaku i kalaiia, a me ka lalani laau kedera.

³⁷ I ka makahiki ha i hoonohoia'i ke kumu o ka hale o Iehova, i ka malama Zifa.

³⁸ A i ka makahiki umikumamakahiki, i ka malama Bula, oia ka walu o ka malama, ua paa ka hale a me kona mau mea a pau, mamuli o na kauoha a pau nona. Ehiku makahiki no hoi kana hana ana ia.

7

¹ A KA he umikumamakolu makahiki o ka Solomona hana ana i kona hale iho, a hoopaa ae la i kona hale a pau.

² Kukulu ae la hoi oia i ka hale ma ka ululaau o Lebanon, hookahi haneri kubita kona loa, a he kanalima kubita kona laula, a he kanakolu kubita ke kiekie, maluna o na

lalani eha o na kia kedera, me na kaola
kedera maluna o ua mau kia la.

- ³ Ua kau ke kedera maluna ma na kaola e kau
ana ma na kia he kanaha kumamalima, he
umikumamalima ma ka lalani.
- ⁴ He mau lalani pukamakani ekolu, ku pono hoi
kekahi puka malamalama i kekahi puka
malamalama, ma na lalani ekolu.
- ⁵ A o na puka a pau, me na kia, ua ku pono me na
puka malamalama, a ua ku pono ka puka
malamalama i ka puka malamalama, ma
na lalani ekolu.
- ⁶ A ua hana oia i ka halekia he kanalima kubita
kona loa, a he kanakolu kubita ka laula; a
o ka lanai, mamua ia o lakou; a o na kia me
ka laau e komo ai hoi mamua o lakou.
- ⁷ Hana iho la oia i ka halekia no ka nohoalii,
kahihonopono ai oia, o ka halekia
hookolokolo; a ua uhiia i ke kedera, mai
kekahi papa a i kekahi papa.
- ⁸ A o kona hale e noho ai, he pahale okoa maloko
o ka halekia, ua like ke ano o ka hana ana.
Hana iho la hoi o Solomona i ka hale no ke
kaikamahine a Parao ana i lawe ai, e like me
keia halekia.
- ⁹ A o keia mau mea a pau, no na pohaku kumukuai
nui, mamuli o ke ana o na pohaku i kalaiia,
i oloia me na pahi olo, maloko, a mawaho,
mai lalo o ke kumu, a hiki i ke kopina, a
mawaho ma ke ku pono ana i ka pahale nui.

- ¹⁰ A o ke kumu, he mau pohaku kumukuai nui,
he mau pohaku nui, he mau pohaku umi
kubita, a he mau pohaku awalu kubita.
- ¹¹ A maluna ae, he mau pohaku kumukuai nui,
mamuli o ke ana o na pohaku kalaiia, a me
na kedera.
- ¹² A o ka pahale nui a puni, he mau lalani ekolu
o na pohaku kalaiia, a me ka lalani laau
kedera, no ka pahale o ka hale o Iehova
maloko, a no ka halekia o ka hale.
- ¹³ Kii aku la o Solomona ke alii a lawe mai ia
Hirama mai Turo mai.
- ¹⁴ He keiki ia a ka wahine kanemake no ka ohana
a Napetali, a no Turo kona makuakane, he
mea hana keleawe; a piha ia i ke akamai a
me ka naauao, a me ka maalea e hana i na
hana me ke keleawe a pau: hele mai la hoi
ia io Solomona la, a hana oia ma kana hana.
- ¹⁵ Hana iho la oia i na kia keleawe elua, he umiku-
mamawalu kubita ke kiekie, ua apoia kela
keia o laua e ka kaula he umikumamalu
kubita.
- ¹⁶ Hana iho la hoi oia i na lunakia elua e kau
maluna o ke poo o na kia, he keleawe
heheeia; elimia kubita ke kiekie o kekahia
kia, elimia hoi kubita ke kiekie o kekahia kia.
- ¹⁷ A me na latike ulana, a me na lei kaula kui no na
lunakia ka mea maluna o na poo o na kia,
ehiku no kekahia lunakia, a ehiku no kekahia
lunakia.
- ¹⁸ Hana iho la i na kia, a i elua hoi lalani a puni
ma kekahia latike e uhii na lunakia, na mea

- maluna o ke poo me na pomegerane, a pela
hoi ia i hana'i no kela lunakia.
- 19 A o na lunakia, na mea maluna o ke poo o na kia,
me na lilia ia maloko o ka lanai, eha kubita.
- 20 A no na lunakia maluna o na kia 'elua he
mau pomegerane maluna e ku pono ana
i ka mahuahua ana, ma ka latike: a o na
pomegerane elua haneri ma na lalani a
puni maluna o kekahi kia.
- 21 Kukulu ae la hoi oia i na kia maloko o ka lanai
o ka luakini: kukulu ae la oia i ke kia akau,
a kapaaku la i kona inoa Iakina: a kukulu
ae la oia i ke kia hema, a kapaaku la i kona
inoa Boaza.
- 22 A maluna o ke poo o na kia he mau lilia: pela i
paa ai ka hana o na kia.
- 23 Hana iho la oia i kahi kai hooheheeia he umi
kubita mai kekahi kae a kekahi kae ona,
he poepoe ia a puni, a elima kubita kona
kiekie, a ua apo hoi ka lope kanakolu ku-
bita.
- 24 A malalo iho o ke kae a puni. he mau kaukama
e apo ana ia, he umi ma ke kubita hookahi,
e apo ana i ke kai: ua hanaia na kaukama i
na lalani elua, i ka wa i hanaia'i ia.
- 25 Kau iho la ia maluna o na bipi kauo he umiku-
mamalua, ekolu e nana ana i ke kukulu
akau, ekolu e nana ana i ke komohaun,
ekolu e nana ana i ke kukulu hema, a ekolu
e nana ana i ka hikina: a maluna iho o lakou
ke kae, a maloko no ko lakou mau hope a
pau.
- 26 Hookahi laula o ka lima ka manoanoa o ia mea,
a o kona kae ua hanaia e like me ke kae o ke

kiaha me na pua lilia; elua tausani bato ke komo iloko.

- 27 Hana iho la oia i na waihona ipu keleawe he umi, eha kubita ka loa o kekahi waihona ipu, eha kubita kona laula, ekolu kubita kona kiekie.
- 28 A o ka hana ana o na waihona ipu, peneia; he mau kae ko lakou, a mawaena o na anuu na kae,
- 29 A maluna iho o ua kae iwaena o na anuu, he mau liona, bipi kauo, a me na keruba: a maluna o na anuu, kahi waihona maluna; a malalo iho o na liona a me na bipi kauo, he mau mea e lewa ana.
- 30 A he mau huila keleawe eha ko kela waihona ipu keia waihona ipu, me na papa keleawe; a malalo ae o na kihi eha, na poohiwi; malalo ae o ka ipu holoi he mau paepae i hooheheeia ma ka aoao o kela mea lewa keia mea lewa.
- 31 A o kona waha malalo o ka papale, a maluna ae he kubita, aka, he poepoe kona waha e like me ka hana ana i ka waihona ipu, he kubita me ka hapalua; a maluna iho o kona waha, he mea kalaia me ko lakou kae ahalike aole poepoe.
- 32 Eha hoi huila malalo ae o na kae, a maloko o na waihona ipu na paepae komo i na huila, a o ke kiekie o ka huila he kubita me ka hapalua kubita.
- 33 A o ka hana ana o na huila, ua like no ia me ka hana ana o ka huila halekaa, o ko lakou mau paepae komo huila, ko lakou mau puu

huila, o ko lakou mau kae huila, o ko lakou mau huila, ua pau i ka hooheheeia.

³⁴ Eha hoi poohiwi paepae ma na kihi eha o ka waihona ipu hookahi; a o na poohiwi o ko ka waihona ipu no ia.

³⁵ A ma ke poo o ka waihona ipu, he mea poepoe he hapalua kubita ke kiekie: a ma ke poo o ka waihona ipu, o kona mau anuu, a me kona mau kae o ko ka waihona ipu no ia.

³⁶ A maluna o na papa o na anuu, a maluna o na kae, i kalai ai oia i na keruba, a me na liona, a me na laau pama, e like me ke kaawale ana o keia me kela, a me na mea lewa a puni.

³⁷ Pela hoi ia i hana'i i na waihona ipu he umi, hookahi ka ninini ana, a me ke ano, a me ka nui, o lakou a pau.

³⁸ Alaila hana iho la oia i na ipu holoi keleawe he umi, komo na bato hookahi kanaha iloko o ka ipu holoi hookahi. Eha kubita kela ipuholoi keia ipuholoi: a pakahi na waihona ipu he umi i ka ipuholoi hookahi.

³⁹ Hoonoho ae la hoi oia i na waihona ipu elima ma ka aoao akau o ka hale, a elima hoi ma ka aoao hema o ka hale; a hoonoho ae la i ke kai ma ka aoao akau o ka hale ma ka hikina e ku pono ana i ke kukulu hema.

⁴⁰ Na Hirama i hana i na ipuholoi a me na ooahi, a me na paipu: pela hoi i hoopau ai o Hirama i na hana a pau ana i hana'i no Solomona ke alii, no ka hale o Iehova;

- 41 I na kia elua, a me na bola o na lunakia na mea maluna o ke poo o na kia elua, a me na latike elua e uhi i na bola elua o na lunakia, na mea maluna o ke poo o na kia;
- 42 A me na pomegerane eha haneri, no na latike elua, elua lalani pomegerane no ka latike hookahi, e uhi i na bola o na lunakia, na mea maluna o na kia;
- 43 A me na waihonaipu he umi, a me na ipuholoi he umi maluna o na waihonaipu;
- 44 A me ke kai hookahi, a me na bipi kauo he umikumamalua malalo iho o ke kai;
- 45 A me na ipu hoolapalapa, a me na ooahi, a me na paipu: a o keia mau mea a pau a Hirama i hana aku ai no Solomona ke alii, no ka hale o Iehova, o ke keleawe huali ia.
- 46 Ma ka papu o Ioredane i hana'i ke alii ia mau mea ma ka lepo manoanoa mawaena o Sukota a me Zaretana.
- 47 Waiho iho la o Solomona i na ipu a pau no ko lakou lehulehu loa ana; aole i loaa na paona o ke keleawe.
- 48 Hana iho la hoi o Solomona i na mea hana o ka hale o Iehova; i ke kuahu he gula, a me ka papa aina maluna iho i kau ai ka berena hoike, he gula.
- 49 A me na ipukukui elima ma ka aoao akau, elima hoi ma ka aoao hema, he gula maemae, mamua o kahi e olelo ai, a me na pua, a me na ipuaila, a me na upa ahi, he gula;
- 50 A me na bola, a me na upakukai, a me na paipu, a me na puna, a me na kapuahi, he gula maemae; a me na ami no na pani o ka hale

maloko, kahi hoano loa, a no na pani o ka hale o ka luakini, he gula no.

51 Pela i paa ai na hana a pau a Solomona i hana'i no ka hale o Iehova: a lawe ae iloko o Solomona i na mea hoolaa a Davida kona makuakane; o ke kala, o ke gula, a me na mea hana, oia kana i waiho pu ai me ka waiwai o ka hale o Iehova.

8

- 1** A LAILA hoakoakoa mai la o Solomona i na lunakahiko o ka Israela, a me na poo a pau o na ohana, na haku iwaena o na makua o na mamo a Israela, io Solomona la ma Ierusalem, e lawe mai lakou i ka pahuberita o Iehova mailoko mai o ke kulanakauhale o Davida, oia o Ziona.
- 2** Akoakoa mai la na kanaka o Israela a pau io Solomona la ke alii, i ka ahaaina, i ka malama Etanima, o ka hiku o ka malama.
- 3** A hele mai na lunakahiko a pau o ka Israela, a kaikai ae la na kahuna i ka pahuberita.
- 4** A lawe mai hoi lakou i ka pahuberita o Iehova, a me ka halelewa o ke anaina, a me na mea laa a pau iloko o ka halelewa, o ia mau mea ka na kahuna a me ka Levi i lawe mai ai.
- 5** A o Solomona ke alii, a o ke anaina a pau o ka Israela, i akoakoa mai io na la, me ia pu lakou imua o ka pahuberita, e kaumaha ana i na hipa a me na bipi kauo, aole i haiia, aole e hiki ke heluia no ka lehulehu.
- 6** A na na kahuna i hookomo i ka pahuberita o Iehova i kona wahii i kahi e olelo ai o ka hale,

- i kahi hoano loa, malalo ae hoi o na eheu o na keruba.
- ⁷ No ka mea, ua hohola na keruba i na eheu elua maluna o kahi o ka pahuberita, a uhi iho la na keruba i ka pahuberita, a me kona mau laau auamo, maluna ae.
- ⁸ Unuhi ae la lakou i na laau auamo, i ikeia na poo o na laau auamo mai ka mea hoano mai ma ka mua o kahi e olelo ai; aole laua i ikeia mawaho mai, a malaila no laua a hiki i keia la.
- ⁹ Aohe mea maloko o ka pahuberita, o na papa pohaku elua wale no a Mose i hahao ai ilaila ma Horeba, kahi i hana'i o Iehova i ka berita me na mamo a Israela i ko lakou puka ana mai, mai ka aina mai o Aigupita.
- ¹⁰ Eia kekahi, i ka puka ana mai o na kahuna mailoko mai o kahi hoano, piha ae la i ke ao ka hale o Iehova;
- ¹¹ Aole i hiki i na kahuna ke ku e lawelawe, no ke ao; no ka mea, ua piha ko Iehova hale i ka nani o Iehova.
- ¹² Alaila olelo ae la Solomona, Ua olelo mai o Iehova e noho oia maloko o ka pouli loa.
- ¹³ Ua hana io ae nei no wau i hale e noho ai nou, kahi kuonoono nou e noho mau loa'i.
- ¹⁴ Haliu mai la ke alii i kona maka; a hoomaikai mai i ke anaina a pau o ka Israela, e ku ana no hoi ke anaina a pau o ka Israela;
- ¹⁵ I aku la hoi oia, E hoomaikaiia'ku o Iehova ke Akua o ka Israela, ka mea nana i olelo mai me kona waha ia Davida i o'u makuakane, a ua hooko mai nei me kona lima, i ka i ana mai,

- 16** Mai ka la mai i lawe mai ai au i ko'u poe kanaka ka Israela mai loko mai o Aigupita, aole au i koho ae i kulanakauhale no loko mai o na ohana a pau o ka Israela e kukulu i ka hale e noho ai ko'u inoa maloko; aka, ua koho no au ia Davida i luna no ko'u lahuikanaka Israela.
- 17** A iloko iho no o ka naau o Davida ko'u makuakane ka manao e kukulu i hale no ka inoa o Iehova ke Akua o Israela.
- 18** A olelo mai la hoi o Iehova ia Davida ko'u makuakane, No ka mea, maloko aku no o kou naau e kukulu i hale no ko'u inoa, he pono oe i kou manao ana pela iloko ou.
- 19** Aka, aole oe o kukulu mai i ka hale: o kau keiki nae, ka mea e puka mai, mailoko mai o kou mau puhaka, oia ke kukulu mai i ka hale no ko'u inoa.
- 20** A ua hooko mai nei no Iehova i ka olelo ana i olelo mai ai, a ua ku ae nei au ma kahi o Davida ko'u makuakane, a ke noho nei au ma ka noho alii o ka Israela e like me ka Iehova olelo hoopomaikai, a ua kukulu ae nei au i ka hale no ka inoa o Iehova ke Akua o ka Israela.
- 21** A hana aku no wau i wahi no ka pahuberita, maloko olaila ka berita o Iehova ana i hana'i me ko makou mau kupuna, i kona lawe ana mai ia lakou mailoko mai o ka aina o Aigupita.
- 22** Ku ae la hoi o Solomona mamua o ke kuahu o Iehova ma ke alo o ke anaina a pau o ka Israela, a hohola ae i kona mau lima i ka lani.

- ²³ Iaku la oia, E Iehova ke Akua o ka Isaela, aohe akua ma ka lani iluna, aole hoi ma ka honua ilalo nei, e like me oe ka mea nana e malama mai i ka berita a me ke aloha me kau mau kauwa ka poe e hele ana ma kou alo me ko lakou naau a pau;
- ²⁴ Ka mea nana i kaohi me Davida ko'u makuakane i ka mea au i olelo hoopomaikai mai ai ia ia; ua olelo hoi oe me kou waha, a ua hooko ae nei oe me kou lima, me nei i neia la.
- ²⁵ Ano hoi, e Iehova ke Akua o ka Isaela, e kaohi oe me kau kauwa o Davida ko'u makuakane, i ka mea au i olelo hoopomaikai ai ia ia, i ka i ana mai, Aole oe e nele i ke kanaka imua o ko'u alo, e noho maluna o ka nohoalii o ka Isaela, ke malama kau mau keiki i ko lakou hele ana, e hele imua o'u, me oe i hele ai imua o'u;
- ²⁶ Ano hoi, e ke Akua o ka Isaela, e hooiaioia mai kau olelo, au e olelo mai ai i kau kauwa ia Davida ko'u makuakane.
- ²⁷ Aka hoi, e noho io mai anei ke Akua ma ka honua anei? Aia hoi! aole e hiki i na lani a me na lani o na lani ke apo ia oe; aole loa hoi keia hale a'u i kukulu ae nei.
- ²⁸ Aka hoi, e maliu mai oe i ka pule a kau kauwa, a i kona nonoi ana, e Iehova ko'u Akua, e hoolohe mai i ka ulono ana a me ka pule a kau kauwa nei e haipule ai imua o kou alo i keia la;
- ²⁹ E nana mau mai kou mau maka i keia hale i ka po a me ke ao, i kahi au i olelo mai ai, Malaila auanei ko'u inoa, i hoolohe mai hoi

oe i ka pule a kau kauwa e haipule ai i keia wahi.

- 30 A e hoolohe mai oe i ka nonoi ana o kau kauwa nei, a o kou poe kanaka hoi o Israela, i ka wa e pule ai lakou i keia wahi; a e hoolohe mai oe ma kou wahi e noho ai ma ka lani, a lohe oe, e kala mai.
- 31 Ina e hana hewa kekahi kanaka i kona hoalauna, a kau ka hoohiki ana maluna ona i hoohiki oia, a hiki mai ia hoohiki ana ma ke alo o kou kuahu maloko o keia hale;
- 32 Alaila, e hoolohe mai oe ma ka lani, a e hana, a e hooponopono mai i kau mau kauwa, e hoahewa ana i ka mea hewa, e hooili ana i kona aoao maluna o kona poo, a e hoapono ana i ka mea pono, e haawi ia ia e like me kona pono.
- 33 Aia pepehia iho kou poe kanaka Israela imua o ka enemi, no ka lakou hana hewa ana'ku ia oe, a huli hou lakou ia oe, a hooiaio i kou inoa, a e pule hoi me ke nonoi aku ia oe i keia hale;
- 34 Alaila, e hoolohe oe ma ka lani, a e kala mai i ka hewa o kou poe kanaka Israela, a e lawe hou mai oe ia lakou i ka aina au i haawi mai ai i ko lakou mau makua.
- 35 Aia hoopaaia ka lani, aole hoi e ua, no ka lakou hana hewa ana ia oe; ina e pule lakou i keia wahi, a e hooiaio i ko inoa, a e haalele hoi i ko lakou mau hewa i kou hookaumaha ana ia lakou,

- 36 Alaila e hoolohe mai oe ma ka lani, a e kala mai i ka hewa o kau poe kauwa, a me kou poe kanaka Iseraela, i ao mai oe ia lakou i ka aoao maikai e hele ai lakou, a e haawi mai hoi i ka ua maluna iho o ka aina au i haawi mai ai i waiwai no kou poe kanaka.
- 37 Ina he wi ma ka aina, ina he mai ahulau, ina he malili, he mae wale, he uhini, a ina he enuhe; a ina e hoopilikiaia e ka enemi ma ka aina o ko lakou mau kulanakauhale, ina he ino, a he mai;
- 38 A ina e pule me ke nonoi aku kekahī kanaka, o kou poe kanaka a pau paha o ka Iseraela, ka mea i ike i ke ino o kona naau iho, a e hapai i kona mau lima i keia hale;
- 39 Alaila e hoolohe mai oe ma ka lani kou wahī e noho ai, a e kala, mai, a e hana, a e haawi i kela kanaka keia kanaka e like me kona mau aoao, ua ikeia kona naau e oe; (no ka mea, o oe, o oe wale no ka i ike i na naau o na keiki a pau o kanaka;)
- 40 I makau lakou ia oe i na la a pau e ola'i lakou ma ka ili o ka aina au i haawi mai ai i ko lakou mau makua.
- 41 A, no ka malihini hoi, aole o kou poe kanaka Iseraela, aka, ua hele mai, mai ka aina loihi aku, no kou inoa;
- 42 (No ka mea, e lohe no lakou i kou inoa nui, a me kou lima ikaika, a me kou lima kakauha;) aia hele mai ia a e pule i keia hale;
- 43 Alaila e hoolohe mai oe ma ka lani kou wahī e noho ai, a e hana e like me ka mea a pau a ka malihini i nonoi ai ia oe; i ike na kanaka a

pau o ka honua i kou inoa, e weli weli ia oe e like me kou poe kanaka Israel; a i ike hoi ua kapaia ma kou inoa keia hale a'u i kukulu ae nei.

⁴⁴ A ina e hele aku kou poe kanaka e kaua i ko lakou enemi, ma kou wahine e hoouna aku ai ia lakou, a e pule aku lakou ia Iehova i ke kulanakauhale au i koho ai, a i ka hale a'u i kukulu ae nei no kou inoa;

⁴⁵ Alaila e hoolohe oe i ka lakou pule me ko lakou nonoi ana, a e kokua mamuli o ko lakou pono.

⁴⁶ Ina e hana hewa lakou ia oe, (no ka mea, aole kanaka hana hewa ole,) a huhu mai oe ia lakou, a haawi aku oe ia lakou imua o ka enemi, a lawe pio aku lakou ia lakou i ka aina o ko lakou enemi, he loihi aku paha, he kokoke mai paha;

⁴⁷ Ina e manao lakou i ko lakou naau, ma ka aina i lawe pio ia'ku ai lakou, a mihi lakou, a e nonoi aku ia oe ma ka aina o ka poe e lawe pio aku ia lakou, e i ana, Ua hewa makou, a ua hana ino, ua lawehala makou:

⁴⁸ A e hoi mai lakou ia oe me ko lakou naau a pau, a me ko lakou uhane a pau, ma ka aina o ko lakou poe enemi naua lakou i alakai pio aku, a e pule aku ia oe i ko lakou aina au i haawi mai ai i ko lakou mau makua, i ke kulanakauhale au i koho mai ai, a i ka hale a'u i kukulu ae nei no kou inoa;

- 49 Alaila e hoolohe mai oe ma ka lani kou wahī e
noho ai, i ka lakou pule a me ko lakou nonoi
ana, a e kokua mamuli o ko lakou pono.
- 50 A e kala mai i kou poe kanaka i hana hewa aku ia
oe, a me ko lakou lawehala ana a pau i hana
hewa aku ai lakou ia oe, a e haawi mai ia
lakou i ke aloha, imua o ka poe i lawe pio
aku ia lakou, i aloha mai lakou ia lakou nei;
- 51 No ka mea, o kou poe kanaka, a o kou waiwai
hoi lakou au i lawe ai mai Aigupita mai, mai
waena konu o ka umu no ka hao:
- 52 I kaakaa kou mau maka i ka pule a kau kauwa, a
i ka nonoi ana o kou poe kanaka, i luhe mai
i ka mea a pau a lakou e noi ai ia oe.
- 53 No ka mea, ua hookaawale mai oe ia lakou mai
na lahuikanaka a pau o ka honua, i hooilina
nou, me Kau i olelo mai ai ma ka lima o
Mose o kau kauwa, i ka wa i lawe mai ai oe
i ko makou mau kupuna, mai Aigupita mai,
e Iehova ka Haku.
- 54 Eia hoi keia, i ka pau ana'e o ka Solomona
haipule ana i keia pule, me keia nonoi ana a
pau ia Iehova, ku ae la ia iluna mai mua mai
o ke kuahu o Iehova, mai ke kukuli ana ma
kona mau kuli me kona mau lima i hohola
ae i ka lani.
- 55 Ku mai la ia, a hoomaikai mai la i ke anaina a
pau o ka Iseraela me ka leo nui,
- 56 E hoomaikaiia'ku o Iehova ka mea nana i haawi
mai i ka maha i kona poe kanaka Iseraela, e
like me kana olelo hoopomaikai a pau; aole
haule kekahī hua o kana olelo hoopomaikai

hemolele a pau ana i olelo ai ma ka lima o
Mose kana kauwa.

- 57 E noho Iehova ko kakou Akua me kakou e like
me ia i noho ai me ko kakou mau makua;
aole e haalele mai ia kakou, aole hoi e kiola
ia kakou.
- 58 E hoohaliu ae oia i ko kakou naau ia ia e hele
ma kona mau aoao a pau, a malama i kana
mau kauoha, a me kona mau kanawai, a me
kona mau kapu, ana i kauoha mai ai i ko
kakou poe kupuna.
- 59 A o keia mau olelo a'u i pule ai au ma ke alo o
Iehova, e kokoke ae ia io Iehova la ko kakou
Akua i ke ao a me ka po, e kokua mau oia
mamuli o ka pono o kana kauwa, a me ka
pono o kona poe kanaka Israela, ma ka
mea o ka la i kona la iho;
- 60 I ike na kanaka a pau o ka honua, o Iehova ke
Akua, aohe e ae.
- 61 Nolaila, e hemolele mai ko oukou mau naau
ia Iehova ko kakou Akua, e hele ma kona
mau kanawai, a e malama hoi i kana mau
kauoha, me ia i keia la,
- 62 Kaumaha aku la ke alii, me ia pu ka Israela a
pau, i na mohai ma ke alo o Iehova.
- 63 Kaumaha aku la hoi o Solomona i ka alana
mohnihoomalu, ana i kaumaha ai no
Iehova, he iwakalua kumamalua tausani
bipi kauo, a he haneri me ka iwakalua
tausani hipa: pela i hoolaa aku ai o
Solomona, a me na mamo a pau a Israela,
i ka hale o Iehova.
- 64 Ia la no, i hoolaa ai ke alii i ka waena o ka pahale
ma ke alo o ka hale o Iehova; no ka mea,

malaila i kaumaha ai oia i na mohaikuni, a me na mohaiai, a me ke kaikea o na mohai-hoomalu; no ka mea, o ke kuahu keleawe ka mea ma ke alo o Iehova, he uuku ia i ole ai e hiki ia ia na mohaikuni, a me na mohaiai, a me ke kaikea o na mohaihoomalu.

- ⁶⁵ Ia manawa, ahaaina ae la o Solomona, a me ia pu ka Iseraela a pau, he anaina nui, mai ke komo ana o Hamota a hiki i ka muliwai o Aigupita, ma ke alo o Iehova, ko kakou Akua, ehiku la, a ehiku la, he umikumamaha mau la.
- ⁶⁶ A i ka walu o ka la hookuu ae la oia i na kanaka; a hoomaikai aku la lakou i ke alii, a hele aku i, ko lakou mau hale lole, e hauoli ana me ka olioli o ka naau no ka pono a pau a Iehova i hana mai ai no Davida i kana kauwa, a me ka Iseraela i kona poe kanaka.

9

- ¹ EIA hoi kekahi, i ka pau ana'e o ko Solomona kukalu ana i ka hale o Iehova, a me ka hale o ke alii, a me ka makemake a pau o Solomona ana i manao ai e hana;
- ² Ike hou ia'ku la o Iehova e Solomona, o ka lua keia, e like me kona ikeia e ia ma Gibeona.
- ³ A olelo mai la o Iehova ia ia, Ua lohe ae nei au i kau pule a me kou nonoi ana au i haipule mai ai imua o'u; a ua hoano ae nei au i keia hale au i kukulu mai nei e waiho mau loa i ko'u inoa malaila; a malaila mau no hoi ko'u mau maka a me ko'u naau.
- ⁴ A ina e hele oe ma ko'u alo, me Davida kou makuakane i hele ai, me ka oiaio o ka naau

- a me ka pololei, e hana i ka'u mea a pau i kauoha aku ai ia oe, a e malama hoi oe i ko'u mau kapu a me ko'u mau kanawai;
- 5** Alaila e hookupaa au i ka nohoalii o kou aupuni maluna mau loa o ka Israela, e like me ka'u olelohoopomaikai ia Davida kou makuakane, i ka i ana'e, Aole oe e nele i ke kanaka maluna o ka nohoalii o ka Israela.
- 6** Aka, ina e kapae ae oukou mai ka hahai ana ia'u o oukou, a o ka oukou mau keiki paha, aole hoi e malama mai i ka'u mau kauoha, a me ko'u mau kanawai a'u i hoonoho ai imua o ko oukou alo, a e hele aku oukou a e malama i na akua e, a e hoomana aku ia lakou:
- 7** Alaila e oki aku au i ka Israela mai ka aina aku a'u i haawi aku ai ia lakou; a o keia hale a'u i hoolaa ai no ko'u inoa, oia ka'u e ki paku aku ai mai ko'u alo aku; a e lilo ae ka Israela i mea e heneheneia, a e hoinoia iwaena o na lahuikanaka a pau.
- 8** A i keia hale ka mea kiekie, o ka mea e maalo ae ma ia, e kahaha oia, a e henehene ae; a e olelo ae hoi lakou, No ke aha la e hana mai ai o Iehova pela i keia aina, a i keia hale?
- 9** A e hai mai lakou, No ko lakou haalele ana ia Iehova i ko lakou Akua, ka mea nana i lawe mai i ko lakou poe kupuna, mai ka aina mai o Aigupita, a ua lalau lakou ma na akua e, a ua hoomana hoi ia lakou, me ka malama aku ia lakou: nolaila i lawe mai ai Iehova i keia poino a pau maluna o lakou.
- 10** Eia hoi kekahi, i ka pau ana'e o na makahiki he iwakalua, a hoopau ae o Solomona i ke

kukulu ana i na hale elua, i ka hale o Iehova,
a me ka hale o ke alii,

11 (Ua haawi mai o Hirama ke alii o Turo, ia
Solomona i na laau kedera a me na laau kaa,
a me ke gula, e like me kona makemake a
pau) alaila, haawi aku o Solomona ke alii
ia Hirama i na kulanakauhale he iwakalua
ma ka aina o Galilaia.

12 A hele mai o Hirama mai Turo mai e ike i na
kulanakauhale a Solomona i haawi ai ia ia;
aole hoi oia i oluolu ia mau mea.

13 I mai la ia, Heaha keia mau kulanakauhale au i
haawi mai ai ia'u, e kuu hoahanau? A kapa
iho la oia ia lakou he aina Kabula, a hiki i
keia la.

14 Ua hoouna ae la o Hirama i na talena gula
hookahi haneri me ka iwakalua, i ke alii.

15 Eia hoi ka mea i auhau ai o Solomona ke alii, o
ka hana i ka hale o Iehova a me kona hale
iho, a me Milo, a me ka pa o Ierusalema, a
me Hazora, a me Megido, a me Gezera.

16 Ua pii o Parao ke alii o Aigupita, a ua hoopio ia
Gezera, a ua puhi aku ia i ke ahi, a ua pepehi
i ko Kanaana, i na mea e noho ana ma ia
kulanakauhale, a haawi mai la oia ia i kana
kaikamahine, ka wahine a Solomona.

17 A kukulu ae la o Solomona ia Gezera a me
Betehorona lalo,

18 A me Baalata a me Tademora i ka waonahele,
ma ka aina,

19 A me na kulanakauhale papaa a pau o
Solomona, a me na kulanakauhale no kona
mau kaa, a me na kulanakauhale no kona
mau hoohololio, a me ka mea a Solomona

i makemake ai e kukulu ma Ierusalema, a ma Lebanonona, a me ka aina a pau o kona aupuni.

- 20 O na kanaka i koe o ka Amora, a me ka Heta, a me Periza, a me ka Hiva a me ka Iebusa, ka poe aole no na mamo a Israela;
- 21 O ka lakou mau keiki i koe mahope o lakou ma ka aina, aole hoi i hiki i na mamo a Israela ke luku pau aku, maluna o lakou i auhau ai o Solomona i hookauwa mai a hiki i keia la.
- 22 Aka, o na mamo a Israela, aole o Solomona i hoolilo i kekahī i kauwa paa; aka, he poe kanaka kaua lakou, a o kana mau kauwa, a me kona mau alii, a me kona mau luna, a me na luna o kona mau kaa, a me kona poe hoohololio.
- 23 Eia na haku o ka poe luna hana maluna o ka Solomona hana, elima haneri mo kanalima, e haku ana maluna o ka poe kanaka e hana ana i ka hana.
- 24 Hele mai la nae ke kaikamahine a Parao mai ke kulanakauhale mai o Davida, i ka hale a Solomona i kukulu ai nona; alaila kukulu ae la oia ia Milo.
- 25 Ekolu ae la ko Solomona kaumaha ana ma ka makahiki i na mohaikuni, a mo na mohai-hoomalu, maluna o ke kuahu ana i hana'i no Iehova, a kuni hoi i ka mea ala maluna o ke kuahu ma ke alo o Iehova. Pela hoi i hoopaa ai oia i ka hale.
- 26 Hana iho la o Solomona ke alii i na moku ma Eziona-gebera, ka mea o pili ana ia Elota,

ma kahakai o ke Kaiula, ma ka aina o Edoma.

²⁷ Hoouna ae la hoi o Hirama i konā poe kauwa, na mea holomoku i ike i ke kai, me na kauwa a Solomona.

²⁸ Holo ae la lakou i. Opera, a lawe mai lakou mai laila mai, i ke gula eha haneri me ka iwakalua talena, a lawe hui ia i ke alii ia Solomona.

10

¹ A LOHE ae la ko alii wahine o Seba i ke kaulana o Solomona, no ka inoa o Iehova, hele mai la oia e hoao ia ia i na mea pohihahi.

² Hele mai la hoi oia i Ierusalem me ka huakai nui loa, a me na kamelo e halihali ana i na mea ala, a me ke gula he nui loa, a me na pohaku makamae; a hiki mai ia io Solomona la, kamailio mai la oia me ia i na mea a pau iloko o kona naau.

³ Hoakaka aku la o Solomona i na mea a pau ana i ninau mai ai, aohe mea hunaia i ke alii, ana i hai ole aku ai ia ia.

⁴ A ike ae la ke alii wahine o Seba, i ke akamai a pau a Solomona, a me ka hale ana i kukulu ai,

⁵ A me ka ai o kona papaaaina, a me ka noho ana o kana mau kauwa, a me ke ku ana mai o kona poe lawelawé, me ko lakou kahiko ana, a me kona poe lawe kiaha, a me kona alapii i pii ai oia i ka hale o Iehova; aole ae la he hanu iloko ona.

- 6** A olelo ae la oia i ke alii, He olelo oiaio ka'u i lohe ai ma ko'u aina no kau mau hana a me kou akamai:
- 7** Aka, aole au i manaoio ia mau olelo, a hiki mai nei au, a ike ko'u mau maka, aia hoi, aole no ka hapalua i haiia mai ia'u; na kela aku kou akamai a me kou pomaikai mamua o ke kaulana a'u i lohe ai.
- 8** Pomaikai kou poe kanaka, pomaikai kau poe kauwa, ka poe e ku mau ana ma kou alo, e hoolohe ana i kou akamai.
- 9** E hoomaikaiia'ku o Iehova kou Akua, ka mea i olioli mai ia oe e hoonoho iho ia oe ma ka nohoalii o ka Israela; no ko Iehova aloha mau ana i ka Israela, nolaila i hoolilo ai oia ia oe i alii e hooponopono, a e hana ma ka maikai.
- 10** Haawi ae la hoi ia wahine i ke alii i hookahi haneri mo ka iwakalua talena gula, a mo na mea ala he nui loa, a me na pohaku makamae; aole hiki hou mai ka nui loa o na mea ala me neia a ke alii wahine o Seba i haawi mai ai ia Solomona ke alii.
- 11** A o na moku hoi o Hirama i lawe mai i ke gula mai Opera mai, ua lawe pu mai i na laau alemuga he nui loa, mai Opera mai, a me na pohaku makamae.
- 12** Hana iho la ke alii i na laau alemuga i mau kia no ka hale o Iehova, a no ka hale o ke alii, a me na lira, a me na pesaleteria no ka poe mele; aole hiki mai na laau alemuga e like me neia, aole hoi i ikeia a hiki i keia la.

- ¹³ A haawi aku la o Solomona ke alii i ke alii wahine o Seba i kona makemake a pau, i kela mea keia mea ana i noi mai ai; o kana ia i haawi aku ai ia ia e like me ka lima o Solomona ke alii; alaila huli ia a hoi aku i kona aina iho, oia me kana mau kauwa.
- ¹⁴ A o ke kaumaha o ke gula i hiki mai ia Solomona i ka makahiki hookahi, aono haneri, me kanaono kumamaono talena gula.
- ¹⁵ Okoa ka mea i loaa ia ia mai ka poe kalepa, a me ka poe kuai mea ala, a me na alii a pau o Arabia, a me na kiaaina o ka aina.
- ¹⁶ A hana iho la o Solomona ke alii i elua haneri paleumauma gula maemae ole, eono haneri sekela gula i lilo i paleumauma hookahi.
- ¹⁷ Hana iho la oia i ekolu haneri palekaua gula kuia; ekolu paona gula i lilo i palekaua hookahi, a waiho ae la ke alii ia lakou maloko o ka hale ma ka ululaau o Lebanonia.
- ¹⁸ Hana iho la hoi ke alii i nohoalii niho elepani nui, a hoouhi ae la i ke gula maikai loa.
- ¹⁹ He mau anuunuu eono ko ka nohoalii, a poepoe ae la ke poo o ka nohoalii ma ke kua, a he mau lima ma kela aoao, ma keia aoao ma kahi e noho ai, elua hoi liona e ku ana ma na lima.
- ²⁰ He umikumamalua liona i ku malaila ma kela aoao a ma keia aoao maluna o na anuunuu eono; aohe mea like me ia i hanaia ma kekahia aupuni.

- 21 A o ko ke alii, ko Solomona mau kiaha inu he gula no, a me na ipu o ka hale ma ka ululaau o Lebanonona, he gula maemae ia; aole mea kala; ua manaoia ia he mea ole i na la o Solomona.
- 22 No ka mea, he mau moku no Taresisa ko ke alii ma ke kai, me na moku o Hirama; i na makahiki ekolu, hookahi ka holo ana mai o na moku no Teresisa, e lawe ana mai i ke gula, a me ke kala, a me ka niho elepani, a me na keko, a me na pikoka.
- 23 A kela aku la o Solomona ke alii i na lii a pau o ka honua i ka waiwai a me ke akamai.
- 24 A imi aku la ka honua a pau i ke alo o Solomona e hoolohe i kona akamai a ke A kua i hahao ai iloko o kona naau.
- 25 Halihali mai la lakou kela kanaka keia kanaka i kona makana, na ipu kala, na ipu gula, na kapakomo, na mea kaua, na mea ala, na lio, na hoki, pela i kela makahiki keia makahiki.
- 26 Hoakoakoa ae la o Solomona i na kaa kaua, a me na hoo hololio: hookahi tausani kaa me na haneri eha kona, a he umikumamalua tausani hoohololio, o na mea ana i hoonoho ai ma na kulanakauhale no na kaa, a me ke alii hoi ma Ierusalema.
- 27 Hoolilo ae la ke alii i ke kala maloko o Ierusalema me he mau pohaku la, a hoolilo hoi oia i na laau kedera me he mau laau Sukamorea ma ke awawa i ka nui loa.

- 28** A ua kaiia mai na lio no Solomona mai Aigupita mai, a na na huakai kalepa a ke alii i lawe ma ke kumukuai.
- 29** A ua puka mai la a holo mai ke kaa kaua no na sekela kala eono haneri, a o ka lio no ka haneri me kanalima; a pela no hoi no na lii a pau o ka Heta, a no na lii o Suria, ma ko lakou mau lima i lawe mai ai ia lakou.

11

- 1** U A aloha aku la o Solomona ke alii i na wahine e he nui no, me ke kaikamahine pu a Parao, na wahine o ka Moaba, a o ka Amora, a o ka Edoma, a o ko Sidona, a me ka Heta;
- 2** O ko na lahuikanaka a Iehova i olelo mai ai i na mamo a Israela, Aole oukou e komoaku io lakou la, aole hoi lakou e komo mai io oukou nei, no ka mea, e hoohuli io lakou la i ko oukou naau mamuli o ko lakou mau akua; hoopili ae la o Solomona ia lakou me ke aloha.
- 3** A loaa ia ia ehiku haneri wahine, na wahine alii, a ekolu haneri haiawahine; a hoohuli e aku kana mau wahine i kona naau.
- 4** O keia hoi, a elemakule ae la o Solomona, ua hoohuli ae kana mau wahine i kona naau mamuli o na akua e; aole i hemolele kona naau ia Iehova kona Akua, e like me ka naau o Davida kona makuakane.
- 5** No ka mea ua hahai ae la o Solomona mamuli o Aseterota ke akua wahine o ko Sidona, a mamuli o Milekoma ka mea i hoowahawa-hia o ka Amona.

- ⁶ A hana ino ae la o Solomona ma ke alo o Iehova,
aole hele okoa mamuli o Iehova, e like me
Davida kona makuakane.
- ⁷ Alaila hana ae la o Solomona i wahi kiekie no
Kemosaka mea inainaia o ka Moaba, ma ka
puu mamua o Ierusalema, a no Moleka ka
mea inainaia o na mamo a Amona.
- ⁸ Pela ia i hana'i no na wahine e ana a pau i kukuni
i ka mea ala a i kaumaha aku no ko lakou
mau akua.
- ⁹ Huhu mai la o Iehova ia Solomona, no ka huli
ana'e o kona naau mai o Iehova ae ke Akua
o Israela, ka mea i ikeia e ia i na manawa
elua;
- ¹⁰ A i kauoha mai la hoi ia ia no keia mea, i ole ia
e hahai mamuli o ua akua e: aka, aole oia i
malama i ka mea a Iehova i kauoha mai ai
ia ia.
- ¹¹ Nolaila i olelo mai ai o Iehova ia Solomona, No
kau hana ana ia mea, aole hoi i malama mai
i kuu berita, a me ko'u mau kanawai a'u i
kauoha aku ai ia oe, e kaili ae auaei au i ke
aupuni mai ou ae nei, a e haawi aku no ia i
kau kauwa.
- ¹² Aka, i kou mau la, aole au e hana i keia no Davida
kou makuakane; aka, mailoko ae o ka lima
o kau koiki e kaili ae ai au ia.
- ¹³ Aole hoi au e kaili honua i ke aupuni a pau, e
haawi aku no au i hookahi ohana i kau keiki
no Davida ka'u kauwa, a no Ierusalema a'u
i koho ai.
- ¹⁴ Hooku mai la o Iehova i ka enemi ia Solomona,
o Hadada no Edoma; no na keiki ia a ke alii
ma Edoma.

- 15 No ka mea, o keia kekahi, i ka wa i noho ai o Davida ma Edoma, hele ae la o Ioaba ka luna o ka poe koa e kanu i ka poe i pepehia, mahope o kona pepehi ana ae i na kane a pau ma Edoma;
- 16 (No ka mea, ua noho o Ioaba malaila me ka Israela a pau i na malama eono, a oki aku oia i na kane a pau ma Edoma;)
- 17 Holo aku la o Hadada, oia me kekahi poe kanaka o Edoma pu o na kauwa o kona makuakane me ia, e hele pu i Aigupita; he keiki uuku o Hadada.
- 18 Puka ae la lakou mailoko ae o Midiana, a hele i Parana; a lawe pu lakou i kanaka mailoko ae o Parana, a hele i Aigupita ia Parao ke alii o Aigupita, nana no i haawi i hale nona, a hooponopono i ai nana, a haawi hoi i kahi aina ia ia.
- 19 A loaa ia Hadada ka lokomaikai nui ia ma ke alo o Parao, a haawi oia ia ia i ka hoahanau o kana wahine iho, ka hoahanau o Tapene ke alii wahine.
- 20 A hanau mai la ka hoahanau o Tapene i keikikane nana, o Genubata, a na Tapene ia i ukuhi maloko o ka hale o Parao; a iloko no o Genubata o ka hale o Parao iwaena o na keiki a Parao.
- 21 A lohe o Hadada ma Aigupita, ua hiamoe o Davida me kona mau makua, a ua make hoi o Ioaba ka luna o ka poe koa, i aku la o Hadada ia Parao, E hookuu ae ia'u e hele ae i ko'u aina,
- 22 Alaila olelo mai la o Parao ia ia, Heaha kou mea hemahema ia'u, ea, i imi ai oe e hoi aku i kou

aina? I aku la oia, Aohe, aka, e hookuu wale mai oe ia'u.

- 23 A hooku mai la ke Akua i kekahi enemi, o Rezona ke keiki a Eliada, ka mea i mahuka mai kona haku aku o Hadedezera ke alii o Zoba;
- 24 Ua hoakoakoa ae la oia i kanaka io ua iho no, a lilo oia i lunakoa maluna o ka papa, i ka wa i pepehi ai o Davida ia lakou; a hele ae la lakou i Damaseko, a noho malaila, a ua alii ae la hoi ma Damaseko.
- 25 A ua ku e mai la oia i ka Israela i na la a pau o Solomona, okoa ke kolohe ana o Hadada: hoowahawaha mai la o Rezona i ka Israela, a ua alii ae la maluna o Suria.
- 26 A o Ieroboama ke keiki a Nebata, o ka Eperaima no Zereda, o Zerua ka inoa o kona makuwahine he wahinekanemake, o ke kauwa a Solomona, oia kekahī i hapai i ka lima ku e i ke alii.
- 27 Eia ka kumu i hapai ai oia i ka lima i ku e i ke alii; kukulu ae la o Solomona ia Milo, a hoopaa iho la i na wahi na ha o ke kulanakauhale o Davida kona makuakane.
- 28 A o ke kanaka Ieroboama, he kanaka koa ikaika loa no ia; a ike ae la o Solomona i ua kanaka ui la e hoomau ana i ka hana, hoolilo ae la oia ia ia i luna maluna o ka ukana a pau o ka ohana o Iosepa.
- 29 Eia kekahī mea ia manawa, i ka puka ana'e o Ieroboama mai Ierusalema ae, loaa oia i ke kaula ia Ahia no Silo, ma ke alanui, a ua

hoaahu oia ia ia iho me ke aahu hou; a o laua wale no ma ke kula.

- ³⁰ Lalau iho la o Ahia i ka aahu hou ka mea maluna iho ona, a uhae ae la ia mea i mau apana he umikumamalua.
- ³¹ A olelo mai la oia ia Ierooboama, E lawe oe i na apana he umi; no ka mea, ke i mai nei o Iehova ke Akua o Israela, peneia, Eia hoi, e kaili ae auanei au i ke aupuni mailoko ae o ka lima o Solomona, a e haawi au i na ohana he umi ia oe:
- ³² Aka, ia ia no ka ohana hookahi no Davida ka'u kauwa, a no Ierusalem ke kulanakauhale a'u i koho ai mailoko mai o na ohana a pau o ka Israela:
- ³³ O No ka mea, ua haalele mai lakou ia'u, a ua hoomana ae ia Aseterota ke akua wahine o ko Sidona, ia Kemosa ke akua o ka Moaba, a ia Milekoma ke akua o na mamo a Amona, aole hoi i hele ma ko'u mau aoao, e hana i ka mea pono i ko'u mau maka, i ka malama i ko'u mau kanawai a me ko'u mau kapu, e like me Davida kona makuakane.
- ³⁴ Aole nae au e kaili honua ae i ke aupuni a pau mailoko ae o kona lima; aka, e hoomau auanei au i kona alii ana i na la a pau o kona ola ana, no Davida ka'u kauwa, a'u i koho ai no kona malama ana i ka'u mau kauoha a me ko'u mau kanawai.
- ³⁵ Aka, e kaili ae auanei au i ke aupuni mailoko ae o ka lima o kana keiki, a e haawi au ia ia oe, i na ohana he umi.
- ³⁶ A i kana keiki, hookahi ohana ka'u e haawi aku ai, i mau ai ke kukui no Davida ka'u kauwa, imua o ko'u alo ma Ierusalem, ke

kulanakauhale a'u i koho ai no'u e waiho ai
i ko'u inoa malaila.

³⁷ A e lawe au ia oe, a e alii ae no oe mamuli o ka
mea a pau a kou uhane e makemake ai, a e
lilo no oe i alii no ka Israela.

³⁸ Peneia auanei hoi, ina e hoolohe mai oe i ka mea
a pau a'u e kauoha aku ai ia oe, a e hele hoi
ma ko'u mau aoao, a hana hoi i ka mea pono
i ko'u mau maka, i ka malama i ko'u mau
kanawai, a me ka'u mau kauoha me Davida
ka'u kauwa i hana'i; alaila owau pu auanei
me oe, a e kukulu au i hale ku paa nou me
ka'u i kukulu ai no Davida, a e haawi au i ka
Israela ia oe.

³⁹ No keia mea, e hookaumaha ai au i na mamo a
Davida, aole hoi i na la a pau loa.

⁴⁰ A imi iho la o Solomona e pepehi ia Ieroboama;
a ku ae la o Ieroboama iluna, a holo aku la
i Aigupita io Sisaka la, ke alii o Aigupita, a
noho ia ma Aigupita a make o Solomona.

⁴¹ A o na hana e ae a Solomona, a me na mea a pau
ana i hana'i, a me kona akamai, aole anei ia i
kakauia ma ka buke o na hana a Solomona?

⁴² A o na la i alii ai o Solomona ma Ierusalema
maluna o ka Israela a pau he kanaha mau
makahiki.

⁴³ A hiamoe iho la o Solomona me kona mau
makua, a ua kanuia ma ke kulanakauhale
o Davida kona makuakane, a alii ae la o
Rehoboama kana keiki ma kona hakahaka.

12

¹ HELE aku la o Rehoboama i Sekema, no ka mea,
ua hele ka Israela a pau i Sekema e hooalii

ia ia.

- ² Eia hoi kekahī, a lohe mai la o Ieroboama ke keiki a Nebata e noho ana ia ma Aigupita, (no ka mea, ua holo aku la ia mai ke alo aku o Solomona a ke alii, a noho no Ieroboama ma Aigupita;)
- ³ Hoouna aku la lakou a kii ia ia; a hele mai Ieroboama a me ke anaina a pau o ka Israela, a olelo aku la lakou ia Hehoboama, i aku la.
- ⁴ Ua hookaumaha mai la kou makuakane i ka makou auamo; ano hoi e hoomama oe i ka hana ehaeha a kou makuakane, a me ka auamo kaumaha ana i kau mai ai maluna o makou, alaila e malama aku makou ia oe.
- ⁵ I mai la oia ia lakou, O hoi oukou i na la ekolu, alaila e hele hou mai io'u nei. Hoi aku la no hoi na kanaka.
- ⁶ A kukakuka mai la o Rehoboama me na kanaka kahiko, ka poe i ku ma ke alo o Solomona kona makuakane, i kona wa e ola ana, ninau mai la, Pehea ia oukou e olelo mai ai e hai aku au i keia poe kanaka?
- ⁷ Olelo aku la lakou ia ia, i aku la, Ina e hookahu oe no keia poe kanaka i keia la, a e malama ia lakou, a e hai aku ia lakou, me ka olelo i na huaolelo pono ia lakou, alaila lilo lakou i poe kauwa mau nau.
- ⁸ Haalele ae la oia i ka olelo a ka poe kanaka kahiko, a lakou i haawi ai ia ia, a kukakuka mai la me na kanaka ui i nunui pu ae me ia, na mea i ku imua o kona alo:
- ⁹ Olelo mai la hoi oia ia lakou, Heaha ka olelo a oukou e olelo mai ai, e hai aku ai kakou i keia poe kanaka, ka poe i olelo mai ia'u, i ka

i aua mai, E hoomama oe i ka auamo a kou makuakane i kau mai ai maluna o makou?

10 Olelo aku la hoi ia ia na kanaka ui i nunui pu ae me ia, i aku la, Penei oe e olelo aku ai i keia poe kanaka i olelo ae nei ia oe, i ka i ana'e, Ua hookaumaha mai la kou makuakane i ka makou auamo; aka, e hoomama mai oe ia mea ia makou; e olelo aku oe ia lakou peneia, E kela aku ka manoanoa o kuu li-maiki i ko ka puhaka o ko'u makuakane.

11 Eia hoi ua hooili ka ko'u makuakane i ka auamo kaumaha maluna o oukou, o hoouka hou aku au ma ka oukou auamo; ua hahau ko'u makuakane ia oukou me na huipa, aka, e hahau aku au ia oukou me na moohueloawa.

12 Pela i hoi mai ai o Ieroboama a me ka poe kanaka a pau io Rehoboama la i ke kolu o ka la, e like me ka ke alii i hoomaopopo ai, i ka i ana mai, E hoi mai oukou io'u nei i ke kolu o ka la.

13 Hai mai la ke alii i kanaka me ka oolea, a ua haalele aku i ka olelo a ka poe kanaka kahiko, a lakou i haawi aku ai ia ia;

14 A olelo mai la hoi ia lakou mamuli o ka olelo a na kanaka ui, i mai la, Ua hookaumaha ko'u makuakane i ka oukou auamo, aka, e hoouka hou aku au ma ka oukou auamo; ua hahau ko'u makuakane ia oukou me na huipa, aka, e hahau aku wau ia oukou me na moohueloawa.

15 Aole hoi i hoolohe ke alii i kanaka, no ka mea, no ka Haku mai no ia, i hooko mai oia i kana olelo a Iehova i olelo mai ai ma ka

lima o Ahia no Silo, ia Ieroboama ke keiki a Nebata.

- 16** A ike ae la ka Israela a pau, i ka hoolohe ole mai o ke alii ia lakou, olelo aku la ka poe kanaka i ke alii, e i ana, Heaha ko makou kuleana iloko o Davida? aole hooilina iloko o ke keiki a Iese. I ko oukou mau halelewa, e ka Israela: ano hoi, e nana i kau ohana iho, e Davida. Pela i hoi ai ka Israela i ko lakou mau halelewa.
- 17** A o na mamo a Israela e noho ana ma na kulanakauhale o Davida, ua alii ae la o Hehoboama maluna o lakou.
- 18** Alaila hoouna ae la o Rehoboama ia Adorama, ka lunaauhau, a hailuku ka Israela a pau ia ia me na pohaku a make ia. Nolaila hele wikiwiki ae la o Rehoboama ke alii e ee ae i kona kaa, e holo i Jerusalema.
- 19** Pela i kipi ai ka Israela i ka ohana a Davida a hiki i keia la.
- 20** Eia kekahī, i ka lohe ana o ka Israela a pau, ua hoi mai o Ieroboama, kii aku la lakou ia ia e hele mai i ke anaina, a hooalii lakou ia ia maluna o ka Israela a pau. Aohe mea i hahai i ka ohana a Davida, o ka Iuda wale no.
- 21** A hoi mai o Rehoboama i Jerusalema, hoakoakoa mai la oia i ka ohana a pau a Iuda, a me ka ohana a Benamina, hookahi haneri me kanawalu tausani kanaka i waeia, na kanaka kaua, e kaua aku i ka ohana a Israela e hoihoi mai i ke aupuni ia Rehoboama ke keiki a Solomona.

- ²² Aka, hiki mai ka olelo a ke Akua, ia Semaia, ke kanaka o ke Akua, i mai la,
- ²³ E olelo aku ia Rehoboama ke keiki a Solomona, ke alii o Iuda, a i ka ohana a pau a Iuda, a me Beniamina, a me ke koena o na kanaka, e i aku,
- ²⁴ Ke i mai nei Iehova penei, Mai pii aku oukou, aole hoi e kaua aku i ko oukou poe hoahanau na mamo a Israela, e hoi kela kanaka keia kanaka i kona hale iho, no ka mea, no'u aku nei keia mea. Hoolohe aku la lakou i ka olelo a ka Haku, a huli lakou e hoi e like me ka olelo a Iehova.
- ²⁵ Alaila kukulu ae la o Ieroboama ia Sekema ma ka mauna Eperaima, a noho ae la malaila; a hele aku malaila aku, a kukulu ae la ia Penuela.
- ²⁶ I iho la o Ieroboama iloko o kona naau, Ano, e hoi aku ai ke aupuni i ka ohana a Davida.
- ²⁷ Ina e pii ae keia poe kanaka e kaumaha ma ka hale o Iehova, ma Ierusalema, alaila e hoi ka naau o keia poe kanaka i ko lakou haku ia Rehoboama ke alii o Iuda, a e pepehi mai lakou ia'u, a e hoi hou aku ia Rehoboama i ke alii o Iuda.
- ²⁸ Nolaila kuka iho la ke alii, a hana i na keikibipi gula elua, a i mai la oia ia lakou, He nui ko oukou hele ana i Ierusalema: Eia hoi kou mau akua, e Israela, i lawe mai ia oe mai ka aina mai o Aigupita.
- ²⁹ Kukulu ae la hoi oia i kekahi ma Betela, a waiho aku hoi i kekahi ma Dana.
- ³⁰ Lilo ae la keia mea i hewa, no ka mea, ua hele ae la na kanaka imua o kekahi i Dana.

- 31 Hana iho la oia i hale no na wahi kiekie, a hoolilo ae la i kekahi mau makaainana i poe kahuna, aole o ko na mamo a Levi.
- 32 Hana iho la hoi o Ieroboama i ka ahaaina i ka walu o ka malama i ka umikumamalima o ka la, e like me ka ahaaina maloko o Iuda, a kaumaha aku la maluna o ke kuahu. Pela oia i hana'i ma Betela, e kaumaha ana no na keikibipi ana i hana'i; a hoonoho aku la oia ma Betela i na kahuna o na wahi kiekie ana i hana'i.
- 33 Pela oia i kaumaha ai ma ke kuahu ana i hana'i ma Betela i ka umikumamalima o ka la o ka walu o ka mahina, ana i noonoo ai ma kona naau; a ua hoomaopopo i ka ahaaina na ka poe mamo a Israela, a ua kaumaha aku la maluna o ke kuahu, a kuni hoi i ka mea ala.

13

- ¹ A IA hoi, hele ae la ke kanaka o ke Akua mailoko ae o Iuda ma ka olelo a Iehova, i Betela, e ku ana o Ieroboama ma ke kuahu e kuni i ka mea ala.
- ² Kahea aku la oia i ke kuahu ma ka olelo a Iehova, i aku la, E ke kuahu, ke kuahu, ke i mai nei Iehova penei, Aia hoi, e hanau ana ke keiki na ka ohana a Davida, o Iosia kona inoa; a maluna iho ou e kaumaha ai oia i na kahuna pule o na wahi kiekie i kukuni i ka mea ala maluna ou, a e puhiia na iwi kanaka maluna iho ou.
- ³ A haawi ae la i ka hoailona ia la, i ae la, Eia ka hoailona a Iehova i olelo mai ai; Aia hoi, e naha ana ke kuahu, e helelei iho ka lehu, ka mea maluna ona.

- ⁴ Eia kekahī, i ka lohe ana o ke alii i ka olelo a ke kanaka o ke Akua, ka mea i kahea i ke kuahu, ma Betela, kikoo aku la o Ieroboama i kona lima mai ke kuahu aku, e i ana, E lalau ia ia. A maloo ae la kona lima ana i kikoo ai ia ia, aole hiki ia ia ke hoihoi ia ia iho.
- ⁵ A ua naha ae la ke kuahu, a ua helelei iho ka lehu mai ke kuahu iho, e like me ka hoailona a ke kanaka o ke Akua i haawi ai, ma ka olelo a Iehova.
- ⁶ Olelo mai la hoi ke alii, i mai la i ke kanaka o ke Akua, E nonoi aku oe i ka maka o Iehova kou Akua, a e pule aku no'u, i hoola hou ia mai ko'u lima no'u. A nonoi aku la ke kanaka o ke Akua ia Iehova, a ua hoola hou ia ko ke alii lima nona, a lilo hoi ia e like me mamua.
- ⁷ Olelo mai la hoi ke alii i ke kanaka o ke Akua, E hele mai oe me au i ka hale, a e hooluolu ia oe iho, a e haawi aku au i ka makana nou.
- ⁸ I aku la ua kanaka la o ke Akua i ke alii, Ina e haawi mai oe i ka hapalua o kou hale ia'u, aole au e komo me oe, aole hoi au e ai i ka berena, aole hoi au e inu i ka wai ma keia wahi.
- ⁹ No ka mea, pela no i kauohaia mai ai au ma ka olelo a Iehova, i ka i ana mai, Mai ai i ka berena aole hoi e inu i ka wai, aole hoi e hoi mai ma ke ala ou i hele aku ai.
- ¹⁰ Pela hoi i hele ai oia ma ke ala e, aole i hoi mai ma ke ala i hele aku ai oia i Betela.
- ¹¹ E noho ana kekahī kaula kahiko ma Betela, a hele mai la kana mau keiki, a hai mai la ia ia i na hana a pau a ke kanaka o ke Akua i

hana'i ia la ma Betela; o na olelo ana i olelo ai i ke alii, oia ka lakou i hai ai i ko lakou makuakane.

¹² A olelo aku la ko lakou makuakane ia lakou, Ma ke ala hea i hele ai ia? Ua ike hoi kana mau keiki i ke ala i hele ai ke kanaka o ke Akua, i ka mea i hele mai, mai Iuda mai.

¹³ I aku la hoi oia i kana mau keiki, E kau aku i ka noholio maluna o ka hoki no'u. Kau aku la hoi lakou i ka noho maluna o ka hoki nona, a holo oia maluna iho.

¹⁴ Hahai aku la oia mamuli o ke kanaka o ke Akua, a loaa oia ia ia e noho ana malalo ae o ka laau oka; a i aku la oia ia ia, O oe anei ke kanaka o ke Akua i hele mai mai Iuda mai? I mai la oia, Owau no.

¹⁵ I aku la oia ia ia, E hele mai me au i ka hale e ai i ka berena.

¹⁶ I mai la hoi oia, Aole e hiki ia'u ke hoi aku me oe, aole hoi au e ai i ka berena, aole hoi e inu i ka wai i keia wahi.

¹⁷ No ka mea, ua oleloia mai ia'u ma ka olelo a Iehova, Mai ai i ka berena, aole hoi e inu i ka wai malaila, aole hoi e hoi mai ma ke ala ou e hele aku ai.

¹⁸ Olelo aku la oia, He kaula no hoi au e like me oe, a ua olelo mai nei ka anela ia'u ma ka olelo a Iehova, i mai la, E hoihoi mai oe ia ia me oe iloko o kou hale e ai oia i ka berena, a inu hoi i ka wai. Hoopunipuni mai no ia ia ia.

¹⁹ Pela ia i hoi ai me ia, a ai iho la i ka berena maloko o kona hale, a ua inu hoi i ka wai.

²⁰ Eia kekahi, i ko laua noho ana, i ka papaaaina, hiki mai la ka olelo a Iehova i ke kaula nana ia i hoihoi mai.

- 21** A kahea aku la oia i ke kanaka o ke Akua i hele
aku mai Iuda aku, i aku la, Ke i mai nei o
Iehova penei, No ka mea, ua hookuli oe i
ka waha o Iehova, aole oe i malama i ke
kauoha a Iehova kou Akua i kauoha mai ai
ia oe,
- 22** Aka, ua hoi mai nei oe, a ua ai oe i ka berena, a ua
inu hoi i ka wai ma keia wahī i olelo ai oia ia
oe, Mai ai oe i ka berena, mai inu oe i ka wai;
aole e hiki kou kupapau i ka halekupapau o
kou mau makua.
- 23** Eia hoi kekahī, mahope iho o kana ai ana i ka
berena, a mahope iho o kona inu ana, kau
aku la oia i ka noholio maluna o ka hoki
nona, no ke kaula ana i hoihoi mai ai.
- 24** A hele ae ia, halawai ka liona me ia, a pepehi
mai la ia ia: a ua hooleiia kona kupapau
ma ke alanui; a ku mai la ka hoki kokoke ia
ia, a o ka liona kekahī i ku mai kokoke i ke
kupapau.
- 25** Aia hoi, maalo ae la na kanaka a ike ae la hoi
i ke kupapau, i hooleiia i ke alanui, a e ku
ana hoi ka liona kokoke i ke kupapau; a hele
lakou a hai ma ke kulanakauhale i noho ai
ke kaula elemakule.
- 26** A i ka lohe ana o ke kaula nana ia i hoihoi ae
mai ke ala ae, olelo ae la oia, O ke kanaka o
ke Akua ia, ka mea i malama ole i ka olelo a
Iehova; a ua haawi ae nei o Iehova ia ia i ka
lionā ka mea nana ia i uhae a i pepehi hoi, e
like me ka olelo a Iehova ana i olelo mai ai
ia ia.

- 27 Kauoha ae la hoi oia i kana mau keiki, i ae la, E kau i ka noholio maluna o ka hoki no'u; kau aku la hoi lakou i ka noholio.
- 28 Holo aku la ia a loaa ia ia kona kupapau i hooleiia ma ke alanui, e ku ana no ka hoki a me ka liona kokoke i ke kupapau: aole i ai ka liona i ke kupapau, aole hoi i uhae aku i ka hoki.
- 29 Hapai ae la ke kaula i ke kupapau o ke kanaka o ke Akua, a kau aku la ia ia maluna o ka hoki, a hoihoi mai ia ia: a hoi mai hoi ke kaula elemakule i ke kulanakauhale, e uwe ae, a e kanu hoi ia ia.
- 30 Hoomoe iho la oia i kona kupapau iloko o kona luakupapau iho, a uwe ae lakou ia ia, e olelo ana, Auwe kuu hoahanau!
- 31 Eia hoi kekahī, mahope iho o kona kanu ana ia ia, olelo ae la oia i kana mau keiki, i ae la, Aia make au, e kanu iho oukou ia'u maloko o ka halekupapau, kahi i kanuia'i ke kanaka o ke Akua, e waiho pu iho i ko'u mau iwi me kona mau iwi:
- 32 No ka mea, o ka olelo ana i hea ku e aku ai i ke kuahu ma Betela ma ka olelo a Iehova, a i na hale a pau o na wahi kiekie maloko o na kulanakauhale o Samaria, e ko io auanei no ia.
- 33 Mahope ae o keia mea, aole i huli ae o Ieroboama mai kona aoao hewa ae, aka, hoolilo ae la oia i na makaainana, i mau kahuna pule no na wahi kiekie; o ka mea make-make, oia kana i hoolaa ai, a lilo ia i kahuna no na wahi kiekie.

³⁴ A lilo keia mea i hewa no ka ohana a Ieroboama, e oki aku ai, a e luku aku ai hoi ia mai ka ili o ka honua aku.

14

- ¹ I A manawa, mai iho la o Abiia ke keiki a Ieroboama.
- ² I ae la o Ieroboama i kana wahine, Ke noi aku nei au e ku ae oe iluna, a e hookamani wale ia oe iho i olo ai oe e ikeia o ka wahine a Ieroboama; a e hele aku i Silo: aia hoi malaila o Abiia ke kaula, ka mea i hai mai ia'u e alii ana au maluna o keia lahuikanaka.
- ³ E lawe pu i kou lima i na papaa palaoa, a me na popo berena he umi, a me ka omole meli, a e hele aku io na la; a e hai mai oia ia oe i ka mea e loaa mai i ke keiki.
- ⁴ Pela hoi i hana aku ai ka wahine a Ieroboama, ku ae la hoi ia iluna, a hele aku i Silo, a hiki i ka hale o Ahia; aole nae i ike o Ahia, no ka mea, ua paa kona mau maka i kona elemakule ana.
- ⁵ I Mai la hoi o Iehova ia Ahia, Aia hoi ke hele mai nei ka wahine a Ieroboama e ninau ia oe i kekahi mea no kana keiki; no ka mea, he mai no kona; penei, a penei hoi e olelo aku ai oe ia ia, no ka mea, eia keia, i kona komo aua'e e hana hoopunipuni oia.
- ⁶ Eia keia, a i ka lohe ana o Ahia i ke kamumu ana o kona mau wawae, i kona komo ana ma ka ipuka, i mai la oia, E komo mai oe, e ka wahine a Ieroboama, no ke aha la oe e hana

hoopunipuni ai? no ka mea, ua hoounaia
mai nei au ia oe me ka mea kaumaha.

- ⁷ E hele oe, e olelo aku ia Ieroboama, Ke olelo mai
nei o Iehova ke Akua o Israela, No ka mea,
ua hookiekie aku au ia oe mai waena aku
o na kanaka, a hoolilo hoi au ia oe i alii
maluna o ko'u lahuikanaka Israela,
- ⁸ A kaili ae hoi i ke aupuni mai ka ohana ae a
Davida, a haawi hoi ia oe; aole hoi oe i
hoohalike ae nei me Davida ka'u kauwa, ka
mea i malama mai i ka'u mau kauoha, ka
mea i hahai mai ia'u me kona naau a pau,
e hana i ka mea wale no i pono i ko'u mau
maka;
- ⁹ Aka, pakela kau hana hewa ana mamua o ka na
mea a pau mamua ou; a ua hele oe a hana
i na akua e nou, a me na kii hooheheeia, e
hoonaukiuki mai ia'u, a ua kiola mai oe ia'a
i hope o kou kua.
- ¹⁰ A e hoopopilikia au i ka ohana a Ieroboama, a
e oki ae au i na kane mai o Ieroboama ae,
a i ka mea paa a me ka mea paa ole iloko o
ka Israela, a e lawe ae au i ke koena o ka
ohana a Ieroboama, e like me ka lawe ana
ae o ke kanaka i ke kipulu a pau loa ae la ia.
- ¹¹ O ka mea a Ieroboama e make iloko o ke
kulanakauhale, oia ka na ilio e ai ai, a o ka
mea e make ma ke kula, oia ka na manu o
ka lewa e ai ai.
- ¹² E ku ae hoi oe, a e hele i kou hale, a komo kou
mau wawae i ke kulanakauhale, e make no
ke keiki.
- ¹³ A e uwe auanei ka Israela a pau nona, a e
kanu hoi ia ia: no ka mea, oia wale no ka
Ieroboama mea e hiki i ka luakupapau, no

ka mea, iloko ona ua loaa'i ka mea pono ia Iehova ke Akua no ka Israela, iloko o ka hale o Ieroboama.

¹⁴ A e hooku ae hoi o Iehova nona iho i alii maluna o ka Israela, nana e hooki i ka ohana a Ieroboama ia la: heaha la hoi? ina no ano.

¹⁵ No ka mea, e hahau mai no Iehova i ka Israela, me he akaakai la i hooluliluiia iloko o ka wai, a e hehu ae oia i ka Israela mai loko ae o keia aina maikai ana i haawi mai ai i ko lakou mau makua, a e hoopuehu ae ma o aku o ka muliwai, no ka mea, ua hana lakou i na kii e hoonaukiuki ana ia Iehova.

¹⁶ A e hookuu wale ae oia i ka Israela, no na hewa o Ieroboama, ka mea i lawehala, a i hoolilo i ka Israela e lawehala.

¹⁷ A ku ae la ka wahine a Ieroboama, a hoi, a hele i Tireza; a hiki oia i ka paepae puka o ka hale, make iho la ke keiki.

¹⁸ Kanu iho la hoi lakou ia ia: a uwe ae la ka Israela a pau ia ia, e like me ka Iehova olelo ana i olelo mai ai ma ka lima o kana kauwa, o Ahia ke kaula.

¹⁹ A o na hana e ae a Ieroboama, o kona kaua ana, a o kona alii ana, ua kakauia ma ka buke o ka oihana a na lii o ka Israela.

²⁰ A o na la i alii ai o Ieroboama, he iwakalua kumamalua mau makahiki: hiamoe iho la oia me kona mau makua, a alii ae la o Nadaba kana keiki i kona hakahaka.

²¹ Ua alii ae la o Rehoboama ke keiki a Solomona maloko o luda. He kanaha kumamakahi ko Rehoboama mau makahiki i ka wa i

hoomaka ai i kona alii ana; a he umiku-mamahiku mau makahiki i alii ai oia iloko o Ierusalem, ke kulanakauhale a Iehova i koho ai iloko o na ohana a pau o ka Israela e waiho iho i kona inoa malaila. A o Naama ka inoa o kona makuwahine, o ka Amona.

- ²² Hana hewa ae la ka Iuda, ma ke alo o Iehova, a hoonaukiuki ae la lakou ia ia, me ko lakou hewa a lakou i hoopakela ai imua o ka mea a pau a ko lakou mau makua i hana hewa ai.
- ²³ No ka mea, ua hana lakou no lakou iho i na wahi kiekie a me na kiiakua, a me na wahi hoomana maluna o na puu kiekie a pau, a malalo iho o na laau malumalu a pau.
- ²⁴ A he poe moeaikane kekahi ma ka aina; a hana no lakou mamuli o na mea hoowahawahaia a pau o na lahuikanaka a Iehova i kiola aku ai imua o na mamo a Israela.
- ²⁵ Eia hoi kekahi i ka lima o ka makahiki o Rehoboama ke alii, hele ku e mai la ia Ierusalem o Sisaka ke alii o Aigupita.
- ²⁶ Kaili ae la oia i na waiwai o ka hale o Iehova, a me ka waiwai o ko ke alii hale, ua pau ia i ka laweia e ia; a ua lawe pu aku hoi oia i na palekaua gula a Solomona i hana'i.
- ²⁷ A ma ko lakou hakahaka, hana ae la o Rehoboama i na palekaua keleawe, a haawi ia mau mea i na lima o ka luna o ka poe koa e kiai ana i ka puka o ko ke alii hale.
- ²⁸ Eia Keia, i ke komo ana'e o ke alii i ka hale o Iehova, halihali aku na koa kiai ia mau mea, a hoihoi mai hoi ia iloko o ke keena o na koa kiai.

- ²⁹ A o na oihana e ae a Rehoboama, a me ka mea a pau ana i hana'i, aole anei ia i kakauia ma ka buke o na oihana a na alii o Iuda?
- ³⁰ He kaua no hoi iwaena o Rehoboama a me Ieroboama i na la a pau o laua.
- ³¹ Hiamoe iho la o Rehoboama me kona mau makua, a ua kanuia me kona mau makua maloko o ke kulanakauhale o Davida. A o Naama ka inoa o kona makuwahine, o ka Amona. A ua alii ae la o Abiama kana keiki ma kona hakahaka.

15

- ¹ I KA umikumamawalu o ka makahiki o Ieroboama ke keiki a Nebata, ua alii ae la o Abiama maluna o Iuda.
- ² Ekolu makahiki i alii ai oia ma Ierusalema: a o Maaka ka inoa o kona makuwahine, ke kaikamahine a Abisaloma.
- ³ Hele ae la hoi oia ma na hewa a pau o kona makuakane ana i hana'i mamua ona; aole hoi i hemolele kona naau ia Iehova kona Akua, e like me ka naau o Davida kona kupunakane.
- ⁴ Aka, no Davida, haawi mai o Iehova kona Akua i kukui ia ia ma Ierusalema, e hooku i kana keiki mahope ona, a e hookupaa ia Ierusalema.
- ⁵ No ka mea, ua hana iho la o Davida i ka mea pono i na maka o Iehova, aole ia i kapae i kekahī mea ana i kauoha mai ai ia ia i na la a pau o kona ola ana, koe wale no ka mea ia Uria ka Heti.
- ⁶ He kaua hoi iwaena o Rehoboama a me Ieroboama i na la a pau o kona ola ana.

- ⁷ A o na oihana e ae a Abiama, a me ka mea a pau ana i hana'i, aole anei ia i kakauia ma ka buke o na oihana a na lii o Iuda. He kaua hoi iwaena o Abiama a me Ieroboama.
- ⁸ Hiamoe iho la hoi o Abiama me kona mau makua; a kanu ae la lakou ia ia iloko o ke kulanakauhale o Davida. A ua alii ae la o Asa kana keiki ma kona hakahaka.
- ⁹ A i ka iwakalua o ka makahiki o Ieroboama ke alii o ka Iseraela, ua alii ae la o Asa, maluna o Iuda.
- ¹⁰ Hookahi kanaha kumamakahī makahiki i alii ai oia ma Ierusalema; a o Maaka ka inoa o kona makuwahine, ke kaikamahine a Abisaloma.
- ¹¹ Hana iho la o Asa i ka mea pono i na maka o Iehova, e like me Davida kona kupuna.
- ¹² Lawe ae la hoi oia i na moeaikane, mai loko ae o ka aina, a hemo ia ia na kiiakua a pau a kona makuakane i hana'i.
- ¹³ A ua hookaawale ae la oia ia Maaka kona makuwahine i ole ai ia e alii wahine, no ka mea, ua hana oia i kiiakua ma kahi e hoomana'i. Hoopau ae la hoi o Asa i kona kiiakua; puhi ae la hoi oia ia ma ke kahawai Kederona.
- ¹⁴ Aka, aole i hoopauia na wahi kiekie; he hemolele nae ka naau o Asa ia Iehova i kona mau la a pau.
- ¹⁵ Lawe mai la hoi oia i na mea a kona kupuna i hoolaa ai, a me na mea ana i hoolaa ai iloko o ka hale o Iehova, i ke kala, i ke gula, a me na mea hana.

- ¹⁶ He kaua no hoi iwaena o Asa a me Baasa ke alii
o ka Israela i na la a pau.
- ¹⁷ Hele ae la o Baasa ke alii o ka Israela, a kukulu
ae la ia Rama, i ole e ae oia i kekah i e puka
aku a e komo mai paha io Asa la ke alii o
Iuda.
- ¹⁸ Lalau iho la hoi o Asa i ke kala a me ke gula a pau
e koe ana o ka waiwai o ka hale o Iehova a
me ka waiwai o ka hale o ke alii, a haawi
ae oia ia mau mea i ka lima o kana mau
kauwa: a hoouna ae la o Asa ke alii ia lakou
io Beneha-dada la ke keiki a Tiberimona, ke
keiki a Heziona ke alii o Suria, e noho ana
ma Damaseko, i ka i ana,
- ¹⁹ He berita iwaena o kaua, a iwaena o ko'u
makuakane a me kou makuakane: eia hoi
ua hoouna aku nei au iou la i ka makana, he
kala, a he gula; e hele mai oe e uhaki i kau
olelo kuikahi me Baasa ke alii o ka Israela,
i hele aku oia mai o'u aku nei.
- ²⁰ Hoolohe mai la o Benehadada ia Asa ke alii,
a hoouna mai la oia i na luna o kona poe
koa e ku e i na kulanakauhale o ka Israela,
a pepehi iho la ia Iiona, a me Dana, a me
Abelabetaamaaka, a me Kinerota a pau, a me
ka aina a pau o Napetali.
- ²¹ Eia hoi kekah i, i ka lohe ana ae o Baasa, haalele
ihoh la oia i ke kukulu ana ia Rama, a noho
no ia ma Tireza.
- ²² Alaila kauoha mai la o Asa ke alii, ma Iuda a
puni, aohe mea kaawale; a lawe ae la lakou
i na pohaku o Rama, a me na laau ona; a, me
ia mau mea i kukulu ai o Asa ke alii ia Geba
ma Beniamina, a me Mizepa.

- 23** A o na oihana e ae a pau a Asa, a me kona ikaika a pau, a me ka hana a pau ana i hana'i, a me na kulanakauhale ana i kukulu ai, aole anei i kakauia ma ka buke oihana a na alii o Iuda? Aka hoi, i ka wa i elemakule ai oia, he mai kona, ma kona mau kapuwai.
- 24** Hiamoe iho la hoi o Asa me kona mau makua, a ua kanuia ma ke kulanakauhale o Davida kona kupuna; a ua alii ae la o Iehosapata ma kona hakahaka.
- 25** Hoomaka ae la o Nadaba ke keiki a Ieroboama i kona alii ana maluna o ka Israela, i ka lua o ka makahiki o Asa ke alii o Iuda, a elua makahiki i alii ai oia maluna o ka Israela.
- 26** Hana hewa ae la oia ma na maka o Iehova, a hele ae la oia ma ka aoao o kona makuakane, a ma na hewa ona i hoolilo ai oia i ka Israela e lawehala.
- 27** Kipi ae la hoi ia ia o Baasa ke keiki a Ahia no ka ohana a Isekara; a pepehi ae la o Baasa ia ia ma Gibetona, no ko Pilisetia; no ka mea, hele kaua ae la o Baasa a me ka Israela a pau ia Gibetona;
- 28** I ke kolu o ka makahiki o Asa ke alii o Iuda i pepehi ai o Baasa ia ia, a ua alii ae la oia ma kona hakahaka.
- 29** Eia kekahī, i kona alii ana, pepehi iho la oia i ka ohana a pau a Ieroboama; aole oia i hookoe no Ieroboama i kekahī mea e hanu ana, a pau ia i ka lukuia e ia; e like me ka olelo a Iehova ana i olelo mai ai ma ka lima o kana kauwa, o Ahia no Silo:
- 30** No na hewa o Ieroboama ana i hana hewa ai, a i hoolilo hoi oia i ka Israela e hana hewa ai, i

kana hoonaukiuki ana, i hoonaukiuki ai oia ia Iehova ke Akua o Israela.

31 A o na oihana e ae a Nadaba, a me ka mea a pau ana i hana'i, aole anei ia i kakauia ma ka buke oihana a na alii o ka Israela?

32 He kaua iwaena o Asa a me Baasa ke alii o ka Israela i na la a pau o laua.

33 I ke kolu o ka makahiki o Asa ke alii o Iuda i hoomaka ai o Baasa ke keiki a Ahia, i kona alii ana maluna o ka Israela a pau ma Tireza i na makahiki he iwakalua kumamaha.

34 Hana hewa ae la hoi oia ma na maka o Iehova, a hele ae la hoi ia ma ka aoao o Ieroboama, a ma kona hewa i hoolilo ai oia i ka Israela e lawehala.

16

1 A LAILA hiki mai la ka olelo a Iehova ia Iehu ke keiki a Hanani, e ku e ana ia Baasa, i ka i ana mai,

2 No ka mea, ua hookiekie ae au ia oe mai ka lepo ae, a hoolilo au ia oe i alii maluna o ko'u poe kanaka Israela; a ua hele hoi oe ma ka aoao o Ieroboama, a ua hoolilo ae oe i ko'u poe kanaka Israela e lawehala, e hoonaukiuki mai lakou ia'u me ko lakou mau hewa;

3 Eia hoi, e kaili ae auanei au i ka hope o Baasa a me ka hope o kana ohana, a e hoolilo ae au i kou ohana e like me ka ohana a Ieroboama ke keiki a Nebata.

- ⁴ O ka Baasa mea e make maloko o ke kulanakauhale, oia ka na ilio e ai ai; a o kana mea e make ma kula, oia ka na manu o ka lewa e ai ai.
- ⁵ A o na oihana e ae a Baasa, a me kana mea i hana'i, a me kona ikaika, aole anei ia i kakauia ma ka buke 'a na lii o ka Israela?
- ⁶ A hiamoe iho la o Baasa me kona mau makua, a ua kanuia ma Tireza: a ua alii ae la o Ela kana keiki ma kona hakahaka.
- ⁷ Eia hoi, ma ka lima o Iehu ke kaula, ke keiki a Hanani i hiki mai ai ka Iehova olelo ku e ia Baasa, a i kana ohana hoi, no ka hewa a pau ana i hana'i imua o na maka o Iehova, e hoonaukiuki ia ia me ka hana a kona mau lima, i kona hoohalike ana me ka ohana a Ieroboama, a no kona pepehi ana ia ia.
- ⁸ I ka iwakalua kumamaono o ka makahiki o Asa ke alii o Iuda, i hoomaka ai o Ela ke keiki a Baasa i kona alii ana maluna o ka Israela, ma Tireza i na makahiki elua.
- ⁹ A kipi ae la ia ia kana kauwa o Zimeri ka luna o ka hapalua o kona mau kaa, ia ia ma Tireza, e inu ana a ona maloko o ka hale o Areza ka puuku o kona hale ma Tireza.
- ¹⁰ A komo ae la o Zimeri a pepehi ae la hoi ia ia, a hoomake loa ia ia, i ka iwakalua kumamahiku o ka makahiki o Asa ke alii o Iuda, a ua alii ae la oia ma kona hakahaka.
- ¹¹ Eia hoi kekahī, ia ia i hoomaka ai i kona alii ana, a noho ia ma ka nohoalii, pepehi koke ae la oia i ka ohana a pau a Baasa: aole oia

i hokoe nona i kekahī kane, o kona io, a o kona mau hanauna.

¹² Pela i luku ai o Zimeri i ka ohana a pau a Baasa, e like me ka olelo a Iehova ana i olelo ku e ai ia Baasa ma ka lima o Iehu ke kaula;

¹³ No na hewa a pau o Baasa, a no na hewa o Ela kana keiki, i lawehala ai laua, a i hoolilo ai hoi laua i ka Israela e lawehala, i ka hoonaukiuki ana ia Iehova ke Akua o ka Israela ma ko laua mau mea lapuwale.

¹⁴ A o na oihana e ae a Ela, a o ka mea a pau ana i hana'i, aole anei ia i kakauia ma ka buke oihana a na lii o ka Israela?

¹⁵ I ka iwakalua kumamahiku o ka makahiki o Asa ke alii o Iuda, i alii ai o Zimeri i na la ehiku ma Tireza; a e hoomoana ku e ana na kanaka ia Gibetona o ko Pilisetia.

¹⁶ A lohe ae na kanaka hoomoana i ka olelo, ua kipi o Zimeri a ua pepehi hoi i ke alii: nolaila hooalii ae la ka Israela a pau ia Omeri ka alihikaua i alii maluna o ka Israela ia la i kahi hoomoana.

¹⁷ Pii ae la o Omeri a me ka Israela pu a pau me ia, mai Gibetona ae, a hoopuni ae la ia Tireza.

¹⁸ Eia hoi kekahī, i ka ike ana o Zimeri ua hoopioia ke kulanakauhale, komo ae la oia i ke keena alii o ko ke alii hale, a puhi iho la i ka hale o ke alii maluna o kona poo iho, a make iho la,

¹⁹ No kona mau hewa ana i hana'i, i kana hana ino ana imua o na maka o Iehova, a i kona hele ana ma ka aoao o Ieroboama, a me kona hewa ana i hana'i, i lawehala ai ka Israela.

- 20** A o na oihana e ae a Zimeri, a me kona kipi ana, ana i hana'i, aole anei ia i kakauia ma ka buke oihana a na lii o ka Israela?
- 21** Alaila maheleia'e la na kanaka o ka Israela i na apana elua: hahai kekahi hapalua mamuli o Tibeni ke keiki a Ginata, e hoalii ia ia; a hahai ae la kekahi hapalua mamuli o Omeri.
- 22** Lanakila ae la ka poe kanaka i hahai mamuli o Omeri maluna o ka poe kanaka i hahai mamuli o Tibeni ke keiki a Ginata, a make o Tibeni, a alii ae la o Omeri.
- 23** I ke kanakolu kumamakahoi o ka makahiki o Asa ke alii o Iuda hoomaka ae la o Omeri i kona alii ana maluna o ka Israela, i na makahiki he umikumamalua: aono makahiki i alii ai oia ma Tireza.
- 24** Kuai lilo mai la oia me Semera, i ka puu Samaria, i na talena kala elua, a kukulu ae la maluna o ka puu, a kapa ae i ka inoa o ke kulanakauhale ana i hana'i, o Samaria, mamuli o ka inoa o Semera ka haku aina o ka puu.
- 25** Aka, ua hana hewa ae la o Omeri imua o na maka o Iehova, a hoopakela aku i kona hewa mamua o ka poe a pau mamua ona.
- 26** No ka mea, na hele ae la oia ma na aoao a pau o Ieroboama ke keiki a Nebata, a me kona hewa i hoolilo ai oia i ka Israela e lawehala, e hoonaukiuki ia Iehova ke Akua o ka Israela ma ko lakou mau mea lapuwale.

- ²⁷ A o na oihana e ae a Omeri i hana'i a me ka ikaika ana i hoike ai, aole anei ia i kakauiā ma ka buke oihana o na lii o ka Israela?
- ²⁸ A hiamoe iho la o Omeri me kona mau makua ma Samaria, a ua alii ae la o Ahava kana keiki ma kona hakahaka.
- ²⁹ Hoomaka ae la o Ahava ke keiki a Omeri i kona alii ana maluna o ka Israela i ke kanakolu kumamawalu o ka makahiki o Asa ke alii o Iuda; a ua alii ae la o Ahava ke keiki a Omeri maluna o ka Israela ma Samaria i na makahiki he iwakalua kumamalua.
- ³⁰ Hoopakela ae la o Ahava ke keiki a Omeri i ka hana hewa imua o na maka o Iehova mamua o ka poe a pau mamua ona.
- ³¹ Eia hoi kekahī, me he mea la, he mea uuuku nona ke hele ma na hewa o Ieroboama ke keiki a Nebata, lawe iho la oia ia Iesebela ke kaikamahine a Etebaala ke alii o ko Sidona, i wahine, a hele hoi ia e malama ia Baala, a hoomana ae la ia ia,
- ³² Kukulu ae la oia i kuahu no Baala maloko o ka hale o Baala, ana i hana'i ma Samaria.
- ³³ Hana iho la o Ahava i wahi e hoomana'i, a ua oi aku ko Ahava hoonaukiuki ana ia Iehova ke Akua o ka Israela mamua o na alii a pau o ka Israela mamua ona.
- ³⁴ I kona mau la hoi, kukulu ae la o Hiela no Betela ia Ieriko; a ia Abirama i kana hiapo i hoonoho ai oia i ke kumu, a ia Seguba kana keiki hope loa i kukulu ai oia i na pani; e like me ka Iehova olelo ana i olelo mai ai ma ka lima o Iosua ke keiki a Nuna.

17

- ¹ OLELO aku la hoi o Elia ka Tiseba no ko Gileada,
ia Ahaba, Ma ke oia ana o Iehova ke Akua
o ka Israela imua ona e ku nei au, aole
auanei he ua, aole hoi he hau i keia mau
makahiki, ma ka'u olelo wale no.
- ² Hiki mai la ka olelo a Iehova ia ia, i ka i ana mai,
- ³ E hele oe mai keia wahi aku, a huli hikina ae, a
e pee aku ma ke kahawai Kerita mamua o
Ioredane.
- ⁴ Eia hoi keia, e inu oe i ko ke kahawai; a ua kauoha
ae nei au i na manukoraka e hanai ia oe
ilaila.
- ⁵ Hele aku la hoi oia a hana e like me ka olelo a
Iehova; no ka mea, ua hele ia a noho ma ke
kahawai Kerita mamua o Ioredane.
- ⁶ A lawe mai na manukoraka i ka berena a me ka
io ia ia i kakahiaka, a i ka berena a me ka io i
ke ahiahi; a inu ae la hoi oia i ko ke kahawai.
- ⁷ Eia kekahi, i ka hala ana'e o na la, maloo iho la ke
kahawai, no ka mea, aohe ua ma ka aina.
- ⁸ A hiki mai ka olelo a Iehova ia ia, i ka i ana mai,
- ⁹ E ku ae, a hele oe i Sarepeta no Sidona, a e noho
malaila: eia hoi, ua kauoha ae nei au i kahi
wahine kanemake malaila e hanai ia oe.
- ¹⁰ Ku ae la hoi, a hele ia i Sarepeta; a hiki i ka
puka o ke kulanakauhale, aia hoi, malaila
ka wahine kanemake e ohi ana i na lala
laau; a kahea aku oia i ka wahine, iaku la,
Ke noi aku nei au ia oe e lawe mai i wahi wai
uuku maloko o ka ipu, e inu au.
- ¹¹ A i kona hele ana e lawe mai, kahea aku la oia
ia ia, iaku la, Ke noi aku nei au ia oe e lawe
mai na'u i kau wahi berena uuku maloko o
kou lima.

- 12 I mai la ka wahine, Ma ke ola ana o Iehova o kou Akua, aole o'u popo palaoa, hookahi wale no piha o ka lima o ka palaoa wali ole, maloko o ka barela, a he wahi aila uuku iloko o kahi omole: eia hoi, e ohi ana au i na lala laau elua e hele au iloko, a e hoomoa'e ia na maua me kuu keiki, e ai maua, a make.
- 13 I aku la o Elia ia ia, Mai makau oe; aka, e hele a e hana oe e like me kau olelo; aka, e hana mua oe i wahi popo palaoa uuku na'u, a e lawe mai i o'u nei, a mamuli e hana oe na olua me kau keiki.
- 14 No ka mea, ko i mai nei o Iehova ke Akua o ka Israela, Aole e emi iho ka barela palaoa wali ole, aole hoi e pau ae ka omole aila a hiki i ka la e haawi mai ai o Iehova i ka ua ma ka ili o ka honua.
- 15 Hele ae la hoi oia a hana e like me ka olelo a Elia; a ai iho la ko kona hale i na la he nui.
- 16 Aole i emi iho ka barela palaoa wali ole, aole hoi i pau ae ka omole aila, e like me ka olelo a Iehova ana i olelo mai ai ma ka lima o Elia.
- 17 Eia kekahi mahope mai o ia mau mea, mai iho la ke keiki a ka wahine ka mea hale, a nui ae la kona mai, aole koe ka hanu iloko ona.
- 18 Olelo mai la ka wahine ia Elia, Heaha ko kaua, e ke kanaka o ke Akua? Ua hele mai nei anei oe io'u nei e hoakaka mai i ko'u hewa, a e pepehi mai hoi i ka'u keiki?
- 19 I aku la oia i ka wahine, E haawi mai i kau keiki ia'u. Lawe ae la oia ia ia mai ko ka wahine poli ae, a hali ae la oia ia ia iluna i kahi keena oluna, i kahi e noho ai oia, a hoomoe iho la ia ia ma kona wahi moe iho;

- ²⁰ A kahea aku la oia ia Iehova, i aku la hoi, E Iehova ko'u Akua, ua lawe mai nei anei oe i ka hewa maluna o ka wahinekanemake, me ia e noho iki ana au, i ka pepehi ana mai i kana keiki?
- ²¹ Hoopalaha ae la oia maluna o ke keiki i na wa ekolu, a kahea aku la ia Iehova, i aku la hoi, E Iehova ko'u Akua, ke pule aku nei au ia oe, e hoi hou mai ka uhane o keia keiki iloko ona.
- ²² Hoolohe mai la hoi o Iehova i ka leo o Elia, a hoi hou mai la ka uhane o ke keiki iloko ona, a ola ae la ia.
- ²³ Lalau iho la o Elia i ke keiki, a lawe iho mai loko iho o ko luna keena iloko o ka hale, a haawi ae la ia ia i kona makuwahine; i aku la hoi o Elia, E ike hoi, ke ola nei kau keiki.
- ²⁴ Olelo mai la ka wahine ia Elia, Ano, ma keia i ike ai au, he kanaka no ke Akua oe, a o ka olelo a Iehova ma kou waha he oiaio.

18

- ¹ EIA kekahī, a i na la he nui, hiki mai la ka olelo a ke Akua ia Elia i ke kolu o ka makahiki, i ka i ana mai, E hele, a e hoike ia oe iho ia Ahava; a e hoohaule au i ka ua maluna o ka ill o ka honua.
- ² Hele ae la hoi o Elia e hoike ia ia iho ia Ahava: a he wi nui ma Samaria.
- ³ Kahea ae la o Ahava ia Obadia, ka luna o kona hale. (He weliweli nui ko Obadia ia Iehova:
- ⁴ A o keia hoi, i ka pepehi ana o Iezebela i na kaula o Iehova, lawe ae la o Obadia i na kaula hookahi haneri, a huna papakanalima ae ia

lakou iloko o ke ana, a hanai ae la ia lakou
me ka berena a me ka wai.)

- ⁵ I mai la hoi o Ahaba ia Obadia, E hele oe ma ka
aina i na kumu wai a pau, a me na kahawai
a pau; e loaa paha uanei ia kaua ka mauu
e malama ai i na lio me na hoki i ola, o
hoonele ia kaua iho i na holoholona a pau.
- ⁶ Mahele ae la hoi laua i ka aina e pau ia i ka heleia.
Hele ae la o Ahaba ma kekahi aoao, oia iho
no; a hele ae la hoi o Obadia ma kekahi
aoao, oia iho no.
- ⁷ Oiai o Obadia ma ke alanui, aia hoi, halawai mai
la me ia o Elia: a ike hoi oia ia ia, moe iho
la oia ilalo ke alo, i aku la, O oe no anei keia
haku o'u, o Elia?
- ⁸ I mai la oia ia ia, Owau no: e hele oe e hai aku i
ko'u haku, Aia hoi o Elia.
- ⁹ I aku la hoi kela, O ke aha la ko'u hewa e haawi ai
oe i kau kauwa i ka lima o Ahaba e pepehi
mai ia'u?
- ¹⁰ Ma ke ola ana o Iehova kou Akua, aohe
lahuikanaka, aohe aupuni, kahi i hoouna
ole aku ai kuu haku e imi ia oe ilaila: a i
ka lakou olelo ana, Aole ia, lawe oia i ka
hoohiki ana i ke Akua, o ia aupuni a me ia
lahuikanaka, i ka loaa ole ana ou ia lakou.
- ¹¹ Ano hoi, ke olelo nei oe, E hele e hai aku i ko'u
haku, Aia hoi o Elia!
- ¹² Eia hoi auanei keia, a hala au mai ou aku nei, e
lawe aku ka Uhane o Iehova ia oe ma kahi
e ike ole ai au; a hele au e hai aku ia Ahaba,
aole hoi e loaa oe ia ia, e pepehi mai auanei
oia ia'u; aka, ke weliweli nei au kau kauwa
ia Iehova mai ko'u wa kamalii mai.

- ¹³ Aole anei i haiia i ko'u haku ka mea a'u i hana
aku ai i ka wa i pepehi ai o Iezebela i na
kaula o Iehova, o ko'u hunu ana'e i hookahi
haneri kanaka o ko Iehova poe kaula, pa-
pakanalima ma ke ana, a hanai aku ia lakou
me ka berena a me ka wai?
- ¹⁴ Ano hoi, ke olelo mai nei oe, E hele e hai aku i
ko'u haku, Aia hoi o Elia! a e pepehi mai no
oia ia'u.
- ¹⁵ I mai la hoi o Elia, Ma ke ola ana o Iehova o na
kaua, imua ona e ku nei au, e hoike io aku
no au ia'u iho ia ia i keia la.
- ¹⁶ Hele aku la hoi o Obadia e halawai me Ahaba, a
hai aku la hoi ia ia; a hele mai la o Ahaba e
halawai me Elia.
- ¹⁷ Eia kekahī, i ka wa i ike ai o Ahaba ia Elia, i
mai la o Ahaba ia ia, O oe no anei ka mea
i hoopilikia i ka Iseraela?
- ¹⁸ I aku la hoi oia, Aole na'u i hoopilikia i ka
Iseraela, aka, nau, a na ka ohana a kou
makuakane, i ko oukou haalele ana i na
kauoha a Iehova, a ua hahai hoi oe mamuli
o na Baala.
- ¹⁹ Ano hoi e kii aku oe e hoakoakoa mai i ka Iser-
aela a pau io'u nei, ma ka mauna Karemela,
a me na kaula o Baala eha haneri me kanal-
ima, a me na kaula o na wahi e hoomana'i
eha haneri, ka poe e ai ana ma ka papaaaina
a Iezebela.
- ²⁰ Pela hoi, kii aku la o Ahaba i na mamo a pau a
Iseraela, a hoakoakoa mai la i na kaula ma
ka mauna Karemela,

- 21** Hele mai la hoi o Elia i ka poe kanaka a pau,
 i mai la hoi, Pehea la ka loihi o ko oukou
 kapekepeke ana iwaena o na manao elua!
 Ina o Iehova ke Akua, e hahai oukou ma-
 muli ona; aka, ina o Baala, e hahai mamuli
 ona, Aole olelo aku na kanaka i kekahī olelo
 ia ia.
- 22** Alaila olelo mai la o Elia i ka poe kanaka, Owau
 nei, owau wale no ka i koe mai he kaula no
 Iehova; aka o na kaula o Baala, eha haneri
 kanaka lakou me kanalima.
- 23** He pono no hoi e haawi mai lakou i na bipi elua,
 ia makou; a e koho ae lakou i kekahī bipi
 no lakou iho, a e okioki i mau apana, a e
 kau aku hoi maluna o ka wahie, aole hoi e
 hahao ae i ke ahi: a e hoomakaukau aku au
 i kekahī bipi, a e kau ae maluna o ka wahie,
 aole hoi e hahao ae i ke ahi:
- 24** A e kahea oukou ma ka inoa o ko oukou mau
 akua, a e kahea wau i ka inoa o Iehova; a
 o ke Akua nana e haawi mai i ke ahi, oia ke
 Akua. Olelo aku la ka poe kanaka a pau, i
 aku la, He pono ka olelo.
- 25** Olelo mai la hoi o Elia i na kaula o Baala, E
 koho oukou i kekahī bipi no oukou iho, a
 e hoomakaukau mua ae ia. no ka mea, he
 lehulehu oukou; a e kahea aku i ka inoa o
 ko oukou mau akua, aole hoi e hahao ae i
 ke ahi.
- 26** Lawe ae la lakou i ka bipi i haawia ia lakou, a
 hoomakaukau ae la hoi ia, a kahea aku la i
 ka inoa o Baala, mai kakahiaka a awakea,
 i ka i ana'ku, E Baala, e hoolohe mai ia
 makou. Aka, aohe leo; aole hoi mea i

hoolohe mai. Lelele ae la lakou ma ke kuahu i hanaia'e.

- ²⁷ Eia kekahī, a awakea ae la, hoomaewaewa ae la o Elia ia lakou, i ae la, E kahea me ka leo nui, no ka mea, he akua ia; e kukakuka ana paha ia, e hahai ana paha ia, e hele loihi ana paha, a e hiamoe ana paha ia, e pono hoi ke hoalaia'e.
- ²⁸ Kahea aku la lakou me ka leo nui, a kokoe iho la lakou ia lakou iho mamuli o ko lakou ano, me na pahi, a me na ihe, a hu mai ke koko maluna iho o lakou.
- ²⁹ Eia hoi kekahī, i ka aui ana'e o ka la, a pule ae lakou a hiki i ka wa e kaumaha ai i ka mohai ahiahi, aohe leo, aole hoi mea hoolohe, aole hoi mea manao mai:
- ³⁰ Alaila, i mai la o Elia i ka poe kanaka a pau, E hookokoke mai io'u nei; Hookokoke ae la ka poe kanaka a pau io na la. Kukulu hou ae la oia i ke kuahu o Iehova i hiolo ilalo.
- ³¹ Lawe ae la hoi o Elia i na po haku he umikuma-malua, mamuli o ka helu ana o na ohana a na keiki a Iakoba, a ka mea i hiki mai ka olelo a Iehova ia ia, o i ana, E kapaia auanei kou inoa o Israela;
- ³² A kukulu ae la oia ia mau pohaku i kuahu no ka inoa o Iehova, a hana iho la hoi i auwaha a puni ke kuahu, o kona nui e hiki ai ke komo na ana hua elua.
- ³³ Hooponopono ae la hoi oia i ka wahie, a okioki ae la i ka bipi i mau apana, a kau ae la maluna o ka wahie; i mai la hoi oia, E hoop-ihā i na barela eha me ka wai, a e ninini iho

maluna iho o ka mohaikuni, a maluna iho
hoi o ka wahie.

³⁴ Olelo mai la hoi oia, I elua o ka oukou hana ana.
Elua'e la no hoi ka lakou hana ana. I mai
la hoi oia, I ekolu hoi o ka oukou hana ana,
Ekolu ae la no hoi ka lakou hana ana.

³⁵ Kahe ae la hoi ka wai a puni ke kuahu; a hoopihā
ihō la no hoi oia i ka auwaha i ka wai.

³⁶ Eia hoi kekahī, i ka wa i kaumaha ai i ka mohai
ahiahi, hookokoke ae la o Elia ke kaula, i
aku la hoi, E Iehova ke Akua o Aberahama,
a me Isaaka, a me Israela, i keia la e
hoikeia'i o oe no ke Akua iloko o ka Israela,
a owau nei kau kauwa, a no kau olelo i hana
aku ai au i keia mau mea a pau.

³⁷ E hoolohe mai ia'u, e Iehova, e hoolohe mai ia'u,
i ike keia lahuikanaka o oe no Iehova ke
Akua; a ua hoohuli hou mai hoi oe i ko lakou
naau.

³⁸ Alaila haule mai la ke ahi o Iehova, a hoopau iho
la i ka mohaikuni, a me ka wahie, a me na
pohaku, a me ka lepo, a miki ae la hoi i ka
wai iloko o ka auwaha.

³⁹ A ike ka poe kanaka a pau, moe iho la lakou ilalo
ke alo, i aku la hoi lakou, O Iehova, oia ke
Akua; o Iehova, oia ke Akua.

⁴⁰ I mai la hoi o Elia ia lakou, E hopu i na kaula o
Baala, i ole e pakele kekahī. Hopu ae la hoi
lakou ia lakou; a alakai ae la o Elia ia lakou
i ke kahawai Kisona, a pepehi iho la hoi oia
ia lakou malaila.

⁴¹ I mai la hoi o Elia ia Ahaba, E pii oe, e ai, a e inu;
no ka mea, eia ke kamumu ana o ka ua nui.

- ⁴² Pela i pii ai o Ahaba e ai a e inu hoi. Pii ae la hoi o Elia i ke poo o Karemela, moe iho la oia malalo ma ka honua, a hookomo iho la i kona maka iwaena o kona mau kuli.
- ⁴³ Alaila olelo mai la oia i kana kauwa, E pii ae oe ano, e nana i kai. Pii ae la hoi oia, a nana aku la, a i aku la, Aole. Olelo mai la hoi oia, E hele hou i ehiku hele ana.
- ⁴⁴ Eia kekahī i ka hiku o kona hele ana, i aku la oia, Aia hoi, ke hoea mai la he wahi ao uuku me he lima la o ke kanaka, mailoko mai o ke kai. A olelo mai la oia, E hele oe e olelo aku ia Ahaba, E hoomakaukau ae oe, a e iho ae, o paa mai oe i ka ua.
- ⁴⁵ Eia kekahī, ia manawa no, poele mai la ka lani i na ao a me ka makani, a nui mai la ka ua. Holo kaa ae la o Ahaba a hiki i Iezereela.
- ⁴⁶ Kau mai la hoi ka lima o Iehova maluna o Elia; kaei iho la oia i kona puhaka iho, a holo ae la imua o Ahaba a i ke komo ana i Iezereela.

19

- ¹ HAI aku la no hoi o Ahaba ia Iezebela i ka mea a pau a Elia i hana'i, a me kona pepehi ana i ka poe kaula me ka pahikaua.
- ² Alaila hoouna ae la o Iezebela i ka elele io Elia la, i ae la, Pela hoi e hana mai ai na akua ia'u, a hui hou no, ke hoohalike ole aku au i kou ola apopo me neia ka hora, me ke ola o kekahī o lakou.
- ³ A ike oia, ku ae la ia iluna, a holo no kona ola, a hiki i Beereseba no Iuda, a haalele i kana kauwa malaila.

- ⁴ A hele ae la hoi oia, i ka hele ana o kekahi la, iloko ae o ka waonahele, hele hoi a noho iho malalo iho o ka laau iunipera; a nonoi aku la hoi nona iho e make ia; iaku la hoi, Ua nui; ano hoi, e Iehova, e lawe aku i kuu ola nei; no ka mea, aole oi aku ko'u maikai mamua o ko'u mau makua.
- ⁵ Moe iho la oia a hiamoe ilalo o ka laau iunipera, aia hoi, ilaila, hoopa mai la kahi anela ia ia, i mai la, E ala, e ai.
- ⁶ Nana ae la hoi ia, aia hoi, kokoke i kona poo, he popopalaao i hoomoaia maluna o ka lanahu, a he omole wai. Ai iho la ia a inu hoi, a moe hou iho la ilalo.
- ⁷ Hele hou mai la ka anela o Iehova, o ka lua ia, a hoopa mai ia ia, i mai la hoi, E ala, e ai, no ka mea, he loihi ka hele ana nou.
- ⁸ Ala ae la ia, a ai iho la, a inu no hoi, a ma ka ikaika no ua ai la, i hele ai oia i na la he kanaha, a i na po he kanaha, i Horeba, ka mauna o ke Akua.
- ⁹ Hikiaku la ia ilaila i ke ana, noho ae la hoi ilaila; aia hoi ka olelo a Iehova ia ia, i mai la hoi oia ia ia, He aha la kau e hana nei maanei, e Elia?
- ¹⁰ Iaku la hoi ia, Ua ikaika loa ae nei au mamuli o Iehova ke Akua o ko ka lani; no ka mea, ua haalele no na mamo a Israela i kau berita, ua hoohiolo hoi i kou mau kuahu, a ua pepehi no hoi i kou poe kaula me ka pahikaua: a owau wale no ka i koe mai, a ua imi mai lakou i ko'u ola e lawe aku.
- ¹¹ I mai la hoi oia, E puka'e, a e ku maluna o ka mauna imua o Iehova. Aia hoi, maalo ae la o

Iehova, a haehae ae la ka makani nui ikaika i na mauna, a wawahi ae la i na pohaku imua o Iehova; aole nae o Iehova iloko o ka makani: a mahope iho o ka makani, he olai; aole nae o Iehova iloko o ke olai.

¹² A mahope iho o ke olai, he ahi; aole nae o Iehova iloko o ke ahi; a mahope iho o ke ahi, he kamumu o ke aheahe malie.

¹³ Eia kekahi, a lohe o Elia, uhi ae la oia i kona maka i kona aahu, a puka ae la oia a ku ma ke komo ana o ke ana. Aia hoi, he leo ia ia, i mai la hoi ia, O ke aha la kau e hana nei maanei, e Elia?

¹⁴ I aku la hoi oia, Ua ikaika loa ae nei au mamuli o Iehova ke Akua o ko ka lani; no ka mea, ua haalele no na mamo a Israela i kau berita, ua hoohiolo hoi i kou mau kuahu, a ua pepehi no hoi i kou poe kaula me ka pahikaua; a owau wale no ka i koe mai, a ua imi mai lakou i ko'u ola e lawe aku.

¹⁵ I mai la hoi o Iehova ia ia, E hele, e hoi ma kou aoao i ka waonahele o Damaseko; a hiki aku oe, e poni aku ia Hazaela i alii maluna o Suria;

¹⁶ A o Iehu ke keiki a Nimesi kau e poni ai i alii maluna o ka Israela; o Elisai ke keiki a Sapata no Abelamehola kau e poni ai i kaula ma kou hakahaka.

¹⁷ Eia auanei keia, o ka mea pakele i ka pahikaua a Hazela, oia ka Iehu e pepehi ai; a o ka mea pakele i ka pahikaua a Iehu, oia ka Elisai e pepehi ai.

¹⁸ Aka, Ke hookoe nei au i na tausani ehiku iloko o ka Israela, i na kuli a pau i kukuli ole ia Baala, a me na waha a pau i honi ole ia ia.

¹⁹ Hele aku la hoi oia mai laila aku, a loaa ia ia o Elisai ke keiki a Sapata, e oopalau ana ia, o na paa bipi kauo he umikumamalua mamua ona, a oia me ka umikumamalua; a maalo ae o Elia ia ia, a kau ae hoi i kona aahu maluna ona.

²⁰ Haalele ae la hoi oia i na bipi kauo, a hahai aku la mamuli o Elia, i aku la, Ke noi aku nei au e honi au i ko'u makuakane, a me kuu makuwahine, alaila e hahai au mamuli ou. I mai la hoi oia ia ia, E hoi aku, no ka mea, o ke aha la ka'u i hana aku ai ia oe?

²¹ Hoi hou aku la oia mai ona aku la, a lalau iho la i kekahi paa bipi kauo, a pepehi loa ia, a baila ae la i ko laua io me na mea haua o ka bipi, a haawi ae na na kanaka, a ai iho la lakou. Alaila, ku ae la oia iluna, a hahai aku la mamuli o Elia, a lawelawe ae la nana.

20

¹ HOULUULU ae la o Benehadada ke alii o Suria i kona poe kaua a pau: kanakolu kuma-malua mau alii me ia, a me na lio a me na kaa: Pii mai la ia a hoopuni ia Samaria, a kaua ae la ia ia.

² Hoouna ae la oia i na elele io Ahaba la ke alii o ka Israela, iloko o ke kulanakauhale;

³ I ae la, Ke olelo nei o Benehadada, O kau kala, a me kau gula, o ka'u ia, a me kau mau

wahine, a me kau mau keiki, o na mea maikai, o ka'u ia.

⁴I aku la o ke alii o ka Israela, e like me kau olelo, e ke alii ko'u haku, ia oe no wau a me ka'u mau mea a pau.

⁵Hoi hou mai na elele, a i mai la, Penei ka olelo ana a Benehadada, i ka i ana, Ua hoouna aku au iou la, i ka i ana aku, E haawi mai oe i kau kala, a me kau gula, a me kau mau wahine, a me kau mau keiki;

⁶Aka, e hoouna hou aku au i ka'u mau kauwa iou la i ka la apopo me neia ka hora, a e huli lakou i kou hale, a me na hale o kau mau kauwa; a eia hoi, o ka mea makemakeia imua o kou mau maka, e lalau ko lakou lima, a e lawe mai.

⁷Alaila hea ae la ke alii o ka Israela i na lunakahiko a pau o ka aina, i ae la, Ke noi aku nei au ia oukou, e nana i ko keia kanaka imi ana e kolohe wale mai; no ka mea, ua kii e mai nei oia i ka'u mau wahine, a me ka'u mau keiki, a me ka'u kala, a me ka'u gula, aole hoi au i hoole aku ia ia.

⁸I aku la na lunakahiko a pau a me na kanaka a pau ia ia, Mai hoolohe aku, aole hoi e ae aku.

⁹Nolaila i olelo aku ai oia i na elele o Benehadada, E hai aku i kuu haku ke alii, O ka mea a pau au i kii mai ai i kau kauwa nei, i kinohou, oia ka'u e hana'i: aka, o keia mea, aole e hiki ia'u ke hana. A hoi na elele, a lawe hou ae la i ka olelo ia ia.

¹⁰Hoouna hou mai la o Benehadada io na la, i mai la, Pela e hana mai ai na akua ia'u, a e hui hou, ke lawa ka lepo o Samaria e piha ai

na lima o ka poe kanaka a pau e hahai ana
mamuli o'u.

11 Olelo aku la ke alii o ka Israela, i aku la, E olelo
aku, Mai hookiekie ka mea e hookomo ana i
ka mea kaua e like me ka mea e kala ana ia.

12 Eia kekahī, i kona lohe ana i keia olelo i kona
wa e inu ana oia me na alii iloko o na
halelewa, i ae la oia i kana poe kauwa, E
hoonohonoho. Hoonohonoho ae la lakou e
ku e i ke kulanakauhale.

13 Hiki mai la kekahī kaula ia Ahaba ke alii o ka
Israela, i ae la oia ia ia, Ke i mai nei o
Iehova penei, Ua ike anei oe i keia lehulehu
loa? Eia hoi, e haawi aku no au ia lakou
iloko o kou lima; a e ike no oe owau no
Iehova.

14 Ninau aku la o Ahaba, Ma owai la? Hai
mai la oia, Ke i mai nei o Iehova, penei,
Ma na kanaka ui o na lii o na panalaau.
Alaila ninau hou aku la oia, Owai ka mea e
hooinakaukau? Hai mai la oia, O oe.

15 Helu ae la oia i na kanaka ui o na lii o na
panalaau, elua haneri me kanakolu kuma-
malua; a mahope o lakou, helu ae la oia i na
kanaka a pau, i na mamo a pau a Israela,
ehiku tausani.

16 Puka aku la lakou i ke awakea. Aka, e inu ana o
Benehadada a ona iloko o na halelewa, oia
pu me na lii, he kanakolu kumamalua alii e
kokua ana ia ia.

17 Puka mua aku la o na kanaka ui o na lii o na
panalaau; hoouna ae la o Benehadada, a
hoike aku la lakou ia ia, i aku la, Ke puka
mai nei na kanaka mai loko mai o Samaria.

- 18 Olelo mai la oia, Ina i puka mai lakou no ka malu, e hopu ia lakou e ola ana; a ina i puka mai lakou no ke kaua, e hopu ia lakou e ola ana.
- 19 Pela i puka ai mai loko ae o ke kulanakauhale ua poe kanaka ui la o na lii o na panalaau, a me ka poe kana i hahai mamuli o lakou.
- 20 Pepehi ae la lakou pakahi i kona kanaka; a auhee ae la ko Suria, a hahai aku la ka Iseraela ia lakou; pakele aku la o Benehadada, ke alii o Suria maluna o ka lio, a me na hololio.
- 21 Pukaaku la ke alii o ka Iseraela, a pepehi ae la i na lio a me na kaa, a laku hoi i ko Suria me ka luku nui loa.
- 22 Hele ae la ke kaula i ke alii o ka Iseraela, i ae la ia ia, E hele, e hookupaa ia oe iho, a e noonoo, a e ike i kau mea e hana aku ai; no ka mea, aia puni ka makahiki, e pii ku e hou mai ke alii o Suria ia oe.
- 23 Olelo aku la na kauwa a ke alii o Suria ia ia, He mau akua o na puu ko lakou mau akua; nolaila i oi ai ko lakou ikaika mamua o ko kakou. E kauaaku kakou ia lakou ma ka papu, a e oi ioaku ko kakou ikaika mamua o ko lakou.
- 24 E hana hoi oe i keia mea, e hookaawale ae i na lii, kela kanaka keia kanaka mai kona wahi ae, a e pani i ko lakou hakahaka me na luna koa.
- 25 A e helu ae i poe kaua nou, e like me kau poe kaua i haule, he lio no ka lio, he kaa no ke kaa; a e kauaaku kakou ia lakou ma ka papu, a e kela ioaku ko kakou ikaika

mamua o ko lakou. Hoolohe mai la oia i ko lakou leo, a hana iho la pela.

- 26 Eia hoi keia, i ka puni ana o ka makahiki, helu aku la o Benehadada i ko Suria, a pii mai la i Apeka e kaua i ka Israela.
- 27 A ua heluia'e la na mamo a Israela, e noho makaukau ana no hoi lakou a pau, a hele ku e aku la ia lakou; a hoomoana iho la o na mamo a Israela imua o lakou, e like me na ohana liilii elua o na keiki kao; aka, o ko Suria, ua paapu ka aina ia lakou.
- 28 Hele mai la ke kanaka o ke Akua, a olelo mai la i ke alii o ka Israela, i mai la, Ke i mai nei o Iehova penei, No ka mea, ke olelo nei lakou, He Akua no na puu o Iehova, aole he Akua ia no na awawa, nolaila e haawi aku ai au i keia poe lehulehu nui iloko o kou lima, a e ike oukou owau no Iehova.
- 29 Hoomoana ae la lakou kekahī i mua o kekahī i na la ehiku. Eia hoi i ka hiku o ka la kaua iho la lakou; pepehi iho la na mamo a Israela i ko Suria i hookahi haneri tausani kanaka hele wawae, i ka la hookahi.
- 30 A holo aku la ke koena i Apeka iloko o ke kulanakauhale; a malaila i hiolo ai ka pa maluna o na tausani he iwakalua kumamahiku o na kanaka i koe. Holo aku la hoi o Benehadada, a komo iloko o ke kulanakauhale, iloko o ke keena maloko ae.
- 31 I aku la kana mau kauwa ia ia, Eia hoi, ua lohe kakou he poe alii lokomaikai na lii o ka ohana a Israela; nolaila, ea, e hookomo i

ke kapa eleele, ma ko makou puhaka, a e kau na kaula ma ko makou mau poo, a e puka aku i ke alii o ka Israela; e hoola paha auanei oia ia oe.

32 Kau iho la lakou i ke kapa eleele ma ko lakou mau puhaka, a kau i na kaula maluna o ko lakou mau poo, a hele i ke alii o ka Israela, i mai la hoi, Ke i mai nei kau kauwa Benehadada, Ke noi aku nei au ia oe e ola au. Iaku la oia, E ola ana anei ia? O ko'u hoahanau no ia.

33 Haka pono mai la na kanaka i puka mai paha mai loko ona, a hopu koke ae, a olelo mai la lakou, O kou hoahanau Benehadada. Alaila olelo aku la ia, E kii aku oukou, a lawe mai ia ia. Alaila hele mai la o Benehadada io na la, a hooee ae la oia ia ia iloko o ke kaa.

34 Olelo ae la o Benehadada ia ia, O na kulanakauhale a ko'u makuakane i kaili ae ai mai kou makuakane ae, oia ka'u e hoihoi aku ai; a e hana oe nou i na alanui ma Damaseko me ko'u makuakane i hana'i ma Samaria. I ae la o Ahava, Me ia berita e hookuu aku ai au ia oe. Hana iho la oia i berita me ia, a hookuu aku la ia ia.

35 A o kekahī kanaka no na keiki a na kaula i olelo ae la i kona hoalauna, ma ka olelo a Iehova, Ke noi aku nei au e pepehi mai oe ia'u. Aole hoi i pepehi na kanaka la ia ia.

36 Alaila olelo ae la oia ia ia, No kou hoolohe ole ana i ka leo o Iehova, eia hoi, i kou hele ana mai o'u aku nei, e pepehi koke no ka liona ia oe. A hele ae la ia mai ona aku la, a loaa koke iho la i ka liona, a make ia ia i ka pepehia.

- ³⁷ Alaila loaa ia ia kekahi kanaka, olelo aku la oia ia ia, Ke noi aku nei au e pepehi mai oe ia'u: pepehi aku la hoi oia ia ia, a eba ia ia i ka pepehiia.
- ³⁸ Hele aku la hoi ke kaula, a kali i ke alii ma ke alanui, a hoonalonalo i kona ano me ka lehu maluna o kona wahi maka.
- ³⁹ A maalo ae la ke alii, kahea aku la oia i ke alii, i aku la hoi, Hele aku la kau kauwa iwaena konu o ke kaua; aia hoi, kapae ae la kekahi kanaka, a lawe mai i kekahi kanaka io'u nei, i mai la, E malama ia ia nei: ina paha i nalo, alaila e lilo kou ola no kona ola, a i ole ia, e uku oe i hookahi talena kala.
- ⁴⁰ A i ko'u lawelawe ana io ia nei, nalo wale ae la ia. Olelo mai la ke alii o ka Israela ia ia, Pela ka hooponopono ana nou, nau no ia i hoakaka.
- ⁴¹ Lalelale ae la oia e hoohemao ae i ka lehu mai kona wahi maka ae; a ike mai ke alii o ka Israela ia ia o kekahi ia o na kaula.
- ⁴² I aku la oia ia ia, Ke i mai nei o Iehova penei, No kou hookuu ana mai loko ae o kou lima i ke kanaka a'u i hoolilo ai i ka luku loa ia, nolaila e lilo kou ola no kona ola, a o kou poe kanaka no kona poe kanaka.
- ⁴³ Hoi aku la hoi ke alii o ka Israela i kona hale, me ke kaumaha, a me ka uluhua a hiki i Samaria.

21

- ¹ EIA hoi kekahi mea mahope mai o ia mau mea, he malawaina ia Nabota no Iezereela, maloko ia o Iezereela, e pili ana i ka halealii o Ahava ke alii o Samaria.

- ² Olelo mai la o Ahaba ia Nabota, i mai la, E haawi mai oe i kou malawaina, i lilo ia ia'u i mala laauikiai, no ka mea, e kokoke mai ana no ia i ko'u hale; a e haawi aku au nau i ka malawaina e oi aku kona mai kai mamua o keia: a i pono ia oe, e haawi aku au ia oe i ke kala e like kona waiwai me ia.
- ³ Iaku la o Nabota ia Ahaba, Na Iehova wau e hoole mai, i ole e haawi au i ka hooilina o ko'u mau makua ia oe.
- ⁴ Hele ae la hoi o Ahaba iloko o kona hale me ke kaumaha, a me ka huhu, no ka olelo a Nabota no Iezereela i olelo aku ai ia ia; no ka mea, ua olelo oia, Aole au e haawi aku i ka hooilina o ko'u mau makua ia oe. Moe iho la oia ma kona wahi moe, haliu e aku i kona maka, aole hoi i ai i ka berena.
- ⁵ Alaila hele ae la kana wahine o Iezebelo io na la, ninau aku la hoi, No ke aha la e kaumaha nei kou uhane, i ole ai oe e ai i ka berena?
- ⁶ Hai mai la oia, No ka mea, ua olelo aku au ia Nabota no Iezereela, i ka i ana'ku ia ia, E haawi mai oe i kou malawaina ia'u no ke kala; a, ina e makemake oe, e haawi aku au ia oe i kekahi malawaina e nona; a olelo mai la oia, Aole au e haawi i kuu malawaina ia oe.
- ⁷ Iaku la hoi o Iezebelo kana wahine ia ia, Ke hoomalu nei anei oe i ke aupuni o ka Israaela? E ala'e a e ai i ka berena, e olioli kou naau, na'u no e haawi i ka malawaina o Nabota no Iezereela ia oe.
- ⁸ Kakau iho la oia i na palapala ma ka inoa o Ahaba, a kau iho la i kona sila, a hoouna aku la i ua mau palapala la i na lunakahiko

a me na haku na mea iloko o kona kulanakauhale, e noho ana me Nabota.

⁹ Palapala ae la ia iloko o na palapala, i aku la, E kala aku i ka hookeai, a e hooku ia Nabota iluna imua o na kanaka;

¹⁰ A e hooku hoi i na kanaka elua, i na keiki a Beliala, imua ona, e hoike ku e ia ia, e olelo ana, Ua hoi no wale oe i ke Akua a i ke alii. Alaila lawe aku ia ia mawaho, a e hailuku ia ia i make ia.

¹¹ Hana iho la na kanaka o ke kulanakauhale, o na lunakahiko a me na haku ka poe e noho ana ma kona kulanakauhale, e like me ka Iezebela i hoouna aku ai ia lakou, a e like me ka mea i kakauia maloko o na palapala ana i hoouna aku ai ia lakou.

¹² Kala ae la lakou i ka hookeai, a hooku ae la lakou ia Nabota iluna imua o na kanaka.

¹³ A hele mai la na kanaka elua, na keiki a Beliala, a noho iho la imua ona: hoike ku e ae la ua mau kanaka la o Beliala ia ia, ia Nabota, ma ke alo o na kanaka, i ae la, Ua hoino wale o Nabota i ke Akua a i ke alii. Alaila lawe ae la lakou ia ia mawaho o ke kulanakauhale, a hailuku aku la lakou ia ia me na pohaku a make ia.

¹⁴ Alaila hoouna mai la lakou io Iezebela la, i mai la, Ua hailukuia o Nabota, a ua make.

¹⁵ Eia hoi kekahī, i ka lohe ana o Iezebela ua hailukuia o Nabota, a ua make, i aku la o Iezebela ia Ahaba, E eu e komo i ka malawaina o Nabota no Iezereela, ka mea ana i haawi ole ai ia oe no ke kala; no ka

mea, aole e ola ana o Nabota, aka, ua make no.

16 Eia keia, i ka lohe ana o Ahaba, ua make o Nabota, ku ae la o Ahaba iluna e iho i ka malawaina o Nabota no Iezereela, e lawe ia nona.

17 Hiki mai la ka olelo a Iehova ia Elia no Tiseba, i mai la,

18 E eu, e iho ae oe e halawai me Ahaba ke alii o ka Israela, o ko Samaria; aia hoi ia maloko o ka malawaina o Nabota kahi i iho ai oia e komo.

19 E olelo aku hoi oe ia ia, i ka i ana aku, Ke i mai nei o Iehova, Ua pepehi ae nei anei oe, a ua lawe hoi nou? A e olelo aku oe ia ia, Ke i mai nei o Iehova penei, Ma kahi i palu ai o na ilio i ke koko o Nabota, malaila no e palu ai na ilio i kou koko, i kou ponoi no.

20 A olelo ae la o Ahaba ia Elia, Ua loaa anei au ia oe, e kuu enemi? Iaku la o Elia, Ua loaa no ia'u, no ka mea, ua kuai lilo aku oe ia oe iho e hana ma ka hewa imua o Iehova.

21 Eia hoi, e hoili au i ka poino maluna ou, a e kaili ae au i kou hope, a e hooki aku au i na kane mai Ahaba aku, a me ka mea paa a me ka mea paa ole iloko o ka Israela.

22 A e hoohalike au i kau ohana me ka ohana a Ieroboama ke keiki a Nebata, a e like me ka ohana a Baasa ke keiki a Ahia, no ka hoonaukiuki ana i hoohuhu mai ai oe ia'u, a i hoolilo ai hoi i ka Israela e lawehala.

23 A no Iezebela kekahi i olelo mai ai o Iehova, i mai la, E ai na ilio ia Iezebela ma ka pa o Iezereela.

²⁴ A o ko Ahaba mea make maloko o ke kulanakauhale, oia ka na ilio e ai ai; a o ka mea make ma kula, oia ka na manu o ka lewa e ai ai.

²⁵ Aohe mea like me Ahaba, ka mea i kuai lilo aku ia ia iho e hana ma ka hewa, ma ke alo o Iehova, ka mea a Iezebela kana wahine i hooikaika aku ai.

²⁶ Hana hoi oia i ka mea e inaina nui ia i kona hahai ana mamuli o naakuakii, e like me ka Amora i hana'i a pau, ka poe a Iehova i kipaku aku ai imua o na mamo a Israela.

²⁷ Eia hoi kekahi, i ka lohe ana o Ahaba i keia mau olelo, uhae ae la oia i kona kapa, a kau i ke kapa eleele i kona io, a hookeai iho. a moe iho la iloko o ke kapa eleele, a hele malie no hoi.

²⁸ Hiki mai la ka olelo a Iehova ia Elia no Tiseba, i mai la,

²⁹ Ke ike nei anei oe i ko Ahaba hoohaahaa ana ia ia iho imua o'u? No kona hoohaahaa ana ia ia iho imua o'u, aole au e lawe mai i ka poino, i kona mau la; aka, i na la o kana keiki e hoili ai au i ka poino maluna o kana ohana.

22

¹ NOHO kuikahi ae la lakou i na makahiki ekolu, aohe kaua iwaena o Suria a me ka Israela.

² Eia hoi kekahi, i ke kolu o ka makahiki, iho ae la o Iehosapata ke alii o Iuda i ke alii o ka Israela.

- ³ Olelo mai ke alii o Iseraela i kana poe kauwa, Ua ike anei oukou, no kakou o Ramotagileada, a noho malie kakou, aole lawe mai mai loko mai o ka lima o ke alii o Suria?
- ⁴ I mai la hoi oia ia Iehosapata, E hele anei oe me au i ke kaua ia Ramotagileada? I aku la hoi o Iehosapata i ke alii o Iseraela, Ua like no wau me oe, a me ko'u poe kanaka me kou poe kanaka, a me ko'u poe lio, me kou poe lio.
- ⁵ Olelo aku la hoi o Iehosapata i ko alii o Iseraela, Ke noiaku nei au e ninau oe i keia la ma ka olelo a Iehova.
- ⁶ Alaila houluulu ae la ke alii o Iseraela i na kaula, eha haneri kanaka paha, ninauaku la ia lakou, E pii anei au i Ramotagileada e kaua, aole paha, ea? Hai mai la hoi lakou, E pii, no ka mea, e haawi mai no ka Haku ia ia iloko o ka lima o ke alii.
- ⁷ Ninauaku la o Iehosapata, Aohe anei he kaula e ae a Iehova maanei, e hiki ia kaua ke ninau ia ia?
- ⁸ Hai mai la ke alii o Iseraela ia Iehosapata, Hookahi kanaka i koe, o Mikaia ke kiekiae Imela, e hiki ia kaua ke ninau ia Iehova ma o na la; aka, ke hoowahawahaaku nei au ia ia, no ka mea, aole ia i wanana mai i ka maikai no'u, i ka ino wale no. Iaku la o Iehosapata, Mai olelo mai ke alii pela.
- ⁹ Alailakaheaaku la ke alii o Iseraela i kekahiluna, iaku la, E hoolalelale mai ia Mikaia ke keiki a Imela.
- ¹⁰ Noho iho la ke alii o Iseraela, a me Iehosapata ke alii o Iuda, kela a me keia ma kona nohoalii

ihō, ua komo laua i ko laua mau kapa alii,
ma kahi akea ma ke komo ana ma ka ipuka
o Samaria; a wanana ae la ka poe kaula a
pau imua o laua.

¹¹ Hana ihō la o Zedekia ke keiki a Kenaana i mau
kiwi hao nonā ihō: i mai la hoi ia. Me neia
mau mea e pahu aku ai oe i ko Suria, a pau
ae lakou.

¹² Pela i wanana ai ka poe kaula a pau, i ka i ana
mai, E pii i Ramotagileada, a e pomaikai; no
ka mea, e haawi mai no Iehova iloko o ka
lima o ke alii.

¹³ A o ka luna i hele e kahea ia Mikaia, olelo aku
la oia ia ia, i aku la, Aia hoi, o na olelo a ka
poe kaula, he maikai i ke alii me ka waha
hookahi; a ke noi aku nei au, e like kau olelo
me ka olelo a kekahī o lakou, e olelo hoi oe
ma ka maikai.

¹⁴ I mai la hoi o Mikaia, Ma ke ola ana o Iehova, o
ka Iehova i olelo mai ai ia'u, oia ka'u e hai
aku ai.

¹⁵ Hele mai la oia i ke alii. A ninau aku la ke
alii ia ia, E Mikaia, e pii ku e anei makou i
Ramotagileada e kaua aku, aole paha ia? I
mai la oia ia ia, E pii a e pomaikai; no ka
mea, e haawi mai no o Iehova iloko o ka
lima o ke alii.

¹⁶ Olelo hou aku la ke alii ia ia, Ehia auanei ko'u
mau manawa e kauoha aku ai ia oe e hai
mai i ka mea pololei wale no ma ka inoa o
Iehova?

¹⁷ I mai la hoi oia, Ua ike au i ka Israela e hele
liili ana maluna o na puu, e like me na hipā

kahu ole: a olelo mai la Iehova, Aole o lakou haku, a hoi lakou, kela kanaka keia kanaka i kona hale iho me ka maluhia.

¹⁸ I mai la ke alii o Israela ia Iehosapata, Aole anei i hai aku au ia oe, Aole o ka maikai kana e wanana mai ai no'u, aka, o ka ino?

¹⁹ Ihou mai la kela, Nolaila e hoolohe mai i ka olelo a Iehova: Ua ike au ia Iehova e noho ana maluna o kona nohoalii, a e ku kokoke ana ia ia ko ka lani a pau ma kona lima akau a ma kona lima hema.

²⁰ Ninau mai la o Iehova, Owai la ka mea e malimali ia Ahaba e pii, a e haule ma Ramotagileada? Hai aku la kekahi penei, a o kekahi penei.

²¹ Hele mai kekahi uhane, a ku iho la imua o Iehova, iaku la, Owau no ke malimali aku ia ia.

²² Ninau mai la hoi o Iehova ia ia, Pehea la? Hai aku la oia, E hele au a e lilo i uhane wahahhee iloko o ka waha o kana poe kaula a pau. I mai la hoi oia, E malimali auanei oe ia ia, a e lanakila no hoi; e hele aku, a e hana pela.

²³ Eia hoi, ua haawi mai nei o Iehova i ka uhane wahahhee iloko o ka waha o keia poe kaula au a pau, a ua olelo mai o Iehova i ka ino nou.

²⁴ Hookokoke ae la no nae o Zedekia ke keiki a Kenaana, a kui aku la ia Mikaia ma kona papalina, ninau aku la, Ma ka aoao hea i hele ai ka uhane o Iehova mai o'u aku nei e olelo aku ia oe?

- 25 I mai la o Mikaia, Aia hoi, e ike no oe, i ka la e komo aku ai oe iloko o ke keena oloko e pee iho.
- 26 Kena ae la no hoi ke alii o Iseraela, E lalau ia Mikaia, a e hoihoi ia ia io Amona la, i ke alii kiaaina o ke kulanakauhale, a io Ioasa la ke keiki a ke alii;
- 27 A e olelo aku, Ke i mai nei ke alii, E hahao ia ia nei iloko o ka halepaahao, a e hanai ia ia me ka berena o ka popilikia, a me ka wai o ka popilikia, a hiki i ka wa e hoi pomaikai mai ai au.
- 28 Olelo mai la o Mikaia, Ina e hoi mai oe me ka pomaikai, aole i olelo mai o Iehova ma o'u nei. I mai la hoi oia, E hoolohe, e na kanaka a pau loa.
- 29 Pela i pii ai ke alii o Iseraela a me Iehosapata ke alii o Iuda i Ramotagileada.
- 30 Olelo mai la ke alii o Iseraela ia Iehosapata, E hoonalonalo iho au ia'u iho e hele iloko o ke kaua, aka, e aahu oe i kou kapa alii. Hoonalonalo iho la ke alii o Iseraela ia ia iho, a hele aku la iloko o ke kaua.
- 31 Kauoha ae la ke alii o Suria i kana mau lunakoa he kanakolu kumamalua, maluna o kona mau kaa, i ae la, Aole i ka mea uuku, aole i ka mea nui e kaua aku ai oukou, i ke alii o Iseraela wale no.
- 32 Eia kekahi, i ka ike ana mai o na lunakaa ia lehosapata, i iho la lakou, Oiaio, o ke alii keia o Iseraela. A huli ae la lakou e kaua ia ia; a auwe iho la o lehosapata.

³³ Eia hoi kekahī, i ka ike ana o na lunakaa aole oia
ke alii o Israela, huli hope ae la lakou mai
ka hahai ana ia ia.

³⁴ Lena walewale ae la kekahī kanaka i ke kakaka,
a ku ia ia ke alii o Israela mawaena o na
ami o ka paleumauma. Nolaila i olelo aku ai
oia i ka mea hooholo i kona kaa, E hoohuli
i kou lima, a e lawe aku ia'u mai loko aku o
ka poe kaua, no ka mea, ua eha au.

³⁵ A mahuahua ae ke kaua ia la, a ua paipaiia'e ke
alii iloko o kona kaa e ku e ana i ko Suria, a
i ke ahiahī, make iho la ia: a kahe iho la ke
koko mai loko iho o ka eha a waena konu o
ke kaa.

³⁶ Laha ae la ka olelo a puni ka poe kaua i ka
napoo ana o ka la, e i ana, O kela kanaka
keia kanaka i kona hale iho, a o kela kanaka
keia kanaka i kona aina iho.

³⁷ Pela i make ai ke alii, a ua laweia mai i Samaria;
a kanu iho la lakou i ke alii ma Samaria.

³⁸ Holoi ae la kekahī i ke kaa maloko o ka wai auau
o Samaria, a palu ae la na ilio i ke koko, a
holoi ae la lakou i kona mea kaua, e like me
ka Iehova olelo, ana i olelo mai ai.

³⁹ A o na hana e ae a Ahaba, a me ka mea a pau
ana i hana'i, a me ka hale niho elepani ana
i kukulu ai, a me na kulanakauhale ana i
kukulu ai, aole anei i kakauia lakou ma ka
buke oihana a na lii o ka Israela?

⁴⁰ Pela i hiamoe ai o Ahaba me kona mau makua;
a alii ae la o Ahazia kana keiki i kona haka-
haka.

- 41 Hoomaka iho la o Iehosapata ke keiki a Asa i kona alii ana maluna o Iuda, i ka ha o ka makahiki o Ahaba ke alii o Israela.
- 42 He kanakolu kumamalima mau makahiki o Iehosapata i ka wa i hoomaka ai oia i kona alii ana, a he iwakalua kumamalima makahiki i alii ai oia maloko o Ierusalema; a o Azuba ka inoa o kona makuwahine ke kaikamahine a Silehi.
- 43 Hele ae hoi oia ma na aoao a pau o Asa kona makuakane, aole oia i kapae ae mai laila ae, e hana ana i ka mea pono ma na maka o Iehova; aka, aole i hoopauia'e na wahi kiekie; kaumaha ae la na kanaka, a kuni ae la i ka mea ala ma na wahi kiekie.
- 44 Hookuikahi like ae la o Iehosapata me ke alii o Israela.
- 45 A o na hana e ae a Iehosapata, a me kona ikaika ana i hoike ai, a me kona kaua ana, aole anei ia i kakauia ma ka buke oihana a na alii o Iuda.
- 46 A o ke koena o na moeaikane e koe ana i na la o Asa kona makuakane, oia kana i lawe ai mai ka aina aku.
- 47 Ilaila aole alii ma Edoma; he kiaaina ke alii.
- 48 Hana iho la hoi o Iehosapata i na moku ma Taresisa e holo i Opira e kii i gula, aole nae i holo lakou, no ka mea, ua nahaha ua mau moku la, ma Ezionagebera.
- 49 Alaila olelo mai la o Ahazia ke keiki a Ahaba, ia Iehosapata, E hele pu paha ka'u mau kauwa, me kau mau kauwa, ma ia mau moku; aole hoi o Iehosapata i ae aku.

- 50 Hiamoe iho la o Iehosapata me kona mau makua, a ua kanuia iho la me kona mau makua, ma ke kulanakauhale o Davida kona kupuna: a alii ae la o Iehorama kana keiki i kona hakahaka.
- 51 Hoomaka ae la o Ahazia ke keiki a Ahaba i kona alii ana maluna o ka Israela ma Samaria, i ka umikumamahiku o ka makahiki o Iehosapata ke alii o Iuda, elua makahiki i alii ai oia maluna o ka Israela.
- 52 Hana hewa ae la hoi oia imua o Iehova, a hele ae la hoi ma ka aoao o kona makuakane, a ma ka aoao o kona makuwahine, a ma ka aoao hoi o Ieroboama ke keiki a Nebata ka mea i hoolilo i ka Israela e lawehala.
- 53 No ka mea, ua malama oia ia Baala, a hoomana aku la ia ia, a ua hoonaukiuki aku ia Iehova i ke Akua o Israela, e like me ka mea a pau a kona makuakane i hana aku ai.

**Baibala Hemolele
The Holy Bible in the Hawaiian language of the United
States, 1868 revision**

Public Domain

Language: 'Olelo Hawai'i (Hawaiian)

Translation by: na na misionari i pai

2015-11-10

PDF generated using Haiola and XeLaTeX on 11 Nov 2022 from source files
dated 9 Oct 2020

4fde4536-9f74-574b-8404-d9ec34a30cbb